

Σ. Θ.

2

DISSERTATIO INAUGURALIS  
MEDICO-CHIRURGICA  
DE

GANGRÆNA  
ET  
SPHACELO,

QUAM  
AUXILIO GRATIÆ DIVINÆ  
DECRETO ET AUCTORITATE

*MAGNIFICI AC GRATIO-  
SISSIMI MEDICORUM COLLEGII*

IN  
ILLUSTRI AC FAMIGERA-  
TISSIMA ARGENTORATENSIIUM  
UNIVERSITATE

PRO  
*CONSEQUENDIS SUMMIS IN ARTE  
MEDICA HONORIBUS ET PRIVILEGIIS*

DOCTORALIBUS  
SOLENNI ΙΑΤΡΟΣΟΦΩΝ CENSURÆ  
SUBMISSE EXPONIT

JOHANNES JOACHIMUS KAST, ARGENT.

AD D. 21 OCTOBR. ANNO M DC LXXXIIX.

---

ARGENTORATI,  
LITERIS JOH. FRIDERICI SPOOR.

4.



V I R O  
NOBILISSIMO, EXCEL-  
LENTISSIMO atq; EXPERIENTISSIMO,  
DOMINO  
HENRICO NICOLAI,  
MEDICINÆ DOCTORI  
PRACTICO  
APUD ARGENTORATENSES  
CELEBERRIMO, INCLUTO, FELICI,  
PATRONO SUO AESTU-  
MATISSIMO, AMANTISSIMO,  
PERPETUA DEVOTIONE COLENDO  
HOC QUICQUID EST INAUGURALIUM  
THEMATUM

IN  
NUNQUAM INTERMORITURAE OBSERVANTIAE  
ET

GRATAE MENTIS

TEKMHPION

ANIMO MANIBUSQUE  
OFFICIOSIS

CONSECRAT

JOHANNES JOACHIMUS KAST.





## THESIS I.



Quandoquidem lætos non habet

exitus, quod præcipiti via, certum aliquem deserit ordinem, sollicitos nos maximè ab initio esse oportuit, ut tractationi nostræ suus ordo, sua constaret methodus, (qua sanctius nihil nobis esse debet in vita,) secus enim si fieret, fluctuationis metus in ipso operis progressu imminere posset. Summo itaque philosophorum Dictatore *Aristot.*

*l. 8. top. c. 2.* primarium esse constat, ante omnia, quid nominis sit, quam quid rei, declarare. *Onomatologiam* ergò, quæ *Etymologia*, *Synonymia* & *Homonymia* absolvitur, primum sistemus: Cui ipsa subnectenda erit *Pragmatologia*, Definitionis, Causarum, Signorum tam Diagnosticatorum quam Prognosticatorum explanationem comprehendens; quibus omnibus tandem Coronidis loco Medendi Methodus quoque subjiçietur: Atque sic totius præsentis nostræ Dissertationis proposuimus synopsis.

II. *Etymologiam* itaque quod concernit, Affectus nostri *Etymon* deductum esse vulgò arbitratur ἄπὸ τῆς γαγγίνης quod apud *Hesychium* est Comedo. Serpit enim de parte in partem, quas etiam successu temporis, nisi obveneris, quasi consumit. *Causabono not. in Strabon.* ἄπὸ τῆς γάγγεος derivatur, quam vocem capram significare vult, hujus enim more omnia *Gangrenam* depascere. Significationem tamen hanc, apud probatos Auctores Græcos invenire non licuit. Σφακελ ἵμδς autem, sive Σφακέλ @ ἄπὸ τῆς σφάττειν, à jugulando, quod quemadmodum in jugulatis, ita etiam in partibus sphacelo contaminatis, omnis pereat calor naturalis. Quidam etiam, quod sphacelata membra colore æmulentur quadantenus plantam, *Salvia sylvestris*, *Theophrasto* σφακέλ @ dictam, ab hac quæ quasi à calore solis exucca & retorrída videtur, derivationem tractam esse volunt: Originationem tamen hanc contra *Moreau de conservand. Valetud.* rejicit *Dieterich. in Fatreo Hippocrat. N. 807.*

III. *Synonymia* ratione, præter *Gangrenæ* vocabulum nullum apud Græcos occurrit aliud, quantum quidem nobis constat, hoc ergò semper retinent. *Marcellus* tamen *Antonius Montagnana*, Italus, cum vocabula hæc pro abusivis & victis censeat, rectius loco *Gangrenæ* *Acroaspes* i. e. le-



viter putrefactum, & loco *Sphaceli* vel *Syderationis* feliciter *Necromenon* cum *Galeno* dici posse existimat: Et quidem tanto magis hæc usurpanda esse ait, quanto propius ad naturam hujus affectionis accedant, & à patrio sermone neutiquam sint aliena. Latini plerumque cum Græcis eadem utuntur voce, audit tamen etiam illis, *incipiens mortificatio, corruptio*, ut & *Ignis St. Marcelli, St. Antony*, cujus ultimæ denominationis rationem, quam seduli inquisiverimus, nullam tamen invenire potuimus. Ex Arabum schola ortum suum traxisse suspicari licet ex *Fallop. tractat. de Tumor. p. n. c. 26.* A *Celso* etiam *Phagedana* vocatur, quamvis improprie, quemadmodum *Montagnana* annotat. Arabibus *Aschachilos* & *Estiomenos* dicitur. Germanis nostris Chirurgis eò quod ut plurimum magnis inflammationibus superveniat, & cum dolore, tumore & ardore magno, aliisque signis ingentem æstum significantibus, conjuncta sit, *der heisse Brand/ oder das heisse Feuer/* dicitur. *Sphacelum* vero etiam per vocabulum *νεκρώσε* & exprimunt. Latinis hic dicitur *Mortificatio, Syderatio*, per similitudinem ab arboribus & plantis desumptam: Est enim *Syderatio* Græcis *ἀσποβολία* & *ἀσποβολισμός* vitium vegetabilium, quando scilicet radices putredine vitiantur, aut tabescunt cum scapo, foliis & floribus, cum torridæ & exuccæ redduntur plantæ, cœli syderumque radiantium injuria. Conferatur etiam *Fallop. l. c.* Italis *el mal della lupa* vulgò vocatur: Vernaculâ nostrâ communiter *der falsche Brand/ das falsche Feuer* significat, ad differentiam scilicet prioris. *Cornelius* tamen *Bontekoe* in *seiner kurzen Abhandlung von dem menschlichen Leben* &c. germanicas has voces inauditas appellat, weil das heisse Feuer so viel zu sagen ist/ als Feures Feuer/ und das falsche so viel ist als warmes Eys/ oder lebendiger Tod. *Aequiore* autem longè fert animo Etymologiam hanc *Joh. Petr. Albrecht. annotation. in Dn. Bontekoe Chirurgiam p. 3. c. 4.* quando liberum cuilibet esse ait, & sufficere, si modo is cui hoc scire incumbit, rem ipsam satis intelligat.

IV. Cum qui probè distinguit, benè etiam doceat, *Homonymia* quoque horum vocabulorum non negligenda esse videtur. Sumitur autem primò *Gangrena* vocabulum in latiore significatione pro ipsa syderatione, putrefactione, corruptione, & mortificatione. Quibusdam etiam *Cancris* nomine venit, observante iterum *Fallop.* qui *l. c.* omnes has voces apud Arabes unum idemque morbi genus significare ait. Similem quoque notamus apud *Celsum* æquivocationem, dum *Cancrum* pro *Gangrena* habet. *l. 5. c. 6. & l. 6.* Juxta *Fallopium*, tumorem scirrhum in oculo denotat. Strictior videtur, quando pro incipiente mortificatione & corruptione partis alicujus, ob inflammationis, qua conflictatur magnitudinem accipitur, *vid. Galeni. l. 2. ad Glaucon. c. 9.* Omnium optima est, quando



quando imperfecta & incipiens partium mollium mortificatio dicitur, ut habet *Guil. Fabricius Hildanus c.1. tractat. de Gangran. & Sphacel.* Hujus quoque non minor existit æquivocatio: notat enim primò morbum in vegetabilium regno grassantem, jam supra allegatum: unde σφακελίζεν, radice exarescere, tabe vel carie consumi. Quidam pro emotione mentis & infania usurpant, alii pro ipso morbo attonito seu Apoplexia. Sumitur etiam *Galen. l.6. m.m. c.5. & l.14. c.17.* pro ossium carie. *Franciscus autem Vallesius in commentar. ad libr. Hipp. de morbis popular. l.2. S.5. artic.30.* ait, *Sphacelum ossium corruptionem proprie dici, ut Gangrena carnis, juxta Galen. de tumor. p. n. latius tamen etiam patente nomine Sphacelum dici omnem cujusq; partis corruptionem, ut Gangrena etiam, quæ est carnis corruptio ob magnitudinem, aut malitiam inflammationis facta, Sphacelus sit.* Quando vero in *l.5. art.40. & 100.* *Sphacelum* tantum corruptionem ossium nuncupat, patet modo latius modo strictius *Sphaceli* vocabulum à prænominato *Vallesio* accipi. In justo ampliore significato notat etiam *Erasmus in Adagiis. Chil.1. centur.2. proverb. 87.* *Sphacelum morbi esse genus, quod ex immodica defatigatione accidere solet.* Quidam etiam, ait, putant esse tormina articularum, quidam ossium tabem. Unde silentio non prætereundum esse videtur hoc loco celebratum *Athenis* proverbium de iis, qui quovis prætextu quod volunt assequuntur: quando nempe dicitur, καὶ σφακελαὶ ποιεῖν ἀπίλειαν: *Faciunt & Sphaceli immunitatem.* Natum enim ait ab eventu hujusmodi. *Pisistratus Tyrannus decimas exigebat ab Atheniensibus eorum quæ in agris provenissent, Itaq; cum aliquando obambulares, videretq; senem quendam in loco petricofo laborantem, rogabat quosnam fructus inde colligeret, respondit senex, dolores & Sphacelos, atq; horum decimam exigit Pisistratus.* Admiratus Tyrannus hominis libertatem in dicendo, decimas posthac Atheniensibus remisit. Propriè tamen loquendo & considerato *Sphacelo* quatenus ad forum medicum spectat, omnibus numeris absolutam & perfectam semper denotat caloris nativi alicujus partis extinctionem & mortificationem, quam non tantum de mollioribus, sed de omnibus & singulis corporis partibus intelligendam esse volumus. Sic τὰ ὅσπερ σφακελίζονται, cum carie absumuntur & contabescunt, nominari solent. Qui rem pressius considerant, inter extinctionem & mortificationem, tanquam inter prius & posterius distinguunt, quatenus scilicet hæc, viz. νέκρωσις, illam ceu priorem insequatur; quorum sententiæ nosmet etiam subscribimus. Tantum ergò hætenus de nomine & definitione verbali, ordinis nunc ratio expostulat, ut realem examini quoque subijciamus.

V. Quanquam ergò ex his hætenus ita prolatis constare posset, quamam in re præcise consistat *Gangrene* natura, differentes nihilominus



nus circa hujus definitionem deprehendimus Auctorum opiniones: Vel quod primò non unam eandemque, vel secundò, qualiscunque tandem sit, minus accurate illam nobis proponant. Inter hos autem primo loco referri meretur *Galenus*, qui in *definit. medic.* ita loquitur: *Gangrenam esse mutationem coloris à statu naturali in alienum & mortificationem membri, cum, vel sine ulcere.* Latiorem vero hanc esse suo definito, adeoque minus perfectam, manifestò patet. Primò enim, generis loco accidens aliquod, seu symptoma ipsi morbo superveniens, proponit. Secundò, cum simpliciter mortificationem appellat, cum *Sphacelo* confundit, ceu jam supra notatum fuit. Majoris vix videtur esse momenti, quam invenire licet *l. de Tumor p. n.* *Gangrenam solidorum corporum mortificationem esse*, asserens, ipsa vero ossa nequaquam corrumpere, maximasq; sequi inflammationes: Dissidentes propterea nos habet *Peccettius*, quando allatam *Galen*i definitionem tanquam optimam pronunciat. Paulo distinctior habetur apud eundem *Galenum l. 2. ad Glaucon. c. 9.* cujus cum *thes. preced.* facta fuerit mentio, hic repetere nolumus. *Paræus* quoque *l. II. de Contus. & Gangr. c. II.* quando hanc per *dispositionem tantum & viam ad νέκρωσιν* definit, cum quid hæc ipsa sit, nondum explicatum dederit, ignotum per æque ignotum exponit. Non dissimilis est ab hac, quam *Sennert. l. 5. p. 2. c. 19.* *Bartholom. Maggius. tractat. de vulner. sclopet.* alique plures haud nominandi, proponunt. Inter hos tamen omnes extollit caput & præcipue rem acu tetigisse nobis videtur Chirurgorum ævi sui facile Princeps, *Guilhelm. Fabric. Hildan. l. c.* quando *Gangrenam* dicit esse principium mortificationis eamq; ut plurimum magnas sequi inflammationes, atq; corrumpere partes molles corporis humani; veluti cutim, musculos, venas, arterias, nervos. Verum si dicendum quod res est, siquidem *Hildanus* non sufficientem partium instituat enarrationem, quas tamen tam exitioso malo obnoxias esse, vel ex ipsius tam præclaro opere abunde satis animadvertere licet.

VI. Indolem ergò seu morem *Gangrenæ* cum diligentius nobiscum volveremus, sequentem definitionem ceu veriore & distinctiorem formari posse, existimavimus. *Gangrenam* nimirum nihil aliud esse quam incipientem & imperfectam, partium omnium corpus humanum constituentium, nativi & modificati caloris destructionem, quam e vestigio ejusdem partis corruptio consequi solet, cum variis symptomatibus, (infra in signorum doctrina recensendis) stipatam, graviorum ut plurimum aut male curatarum phlegmonum pedissequam. Et nisi in tempore huic te obviam dederis, stupenda celeritate, mortis faciem induit, h. e. in ipsum *Sphacelum* degenerat, qui nobis per omnimodam omnibusq; numeris absolutam caloris naturalis extinctionem, summa putredine, summo cum fœtore conjunctam, definitur. Ex quo apparet, quo modo



modo *Gangrena* & *Sphacelus* ab invicem differant, nempe non essentialiter, sed gradu saltem; quod scilicet illa nunc major, nunc minor sit, vel etiam maxima, quæ *Sphacelum* constituere potest.

VII. Subiectum *Gangrena* diximus esse omnes & singulas corporis nostri partes, tam molliores quam solidiores, nullis exceptis. Affer- tum vero hoc nostrum tanto durius nobismet ipsis videtur, quanto ma- jor est contrariantium. Doctorum tam veteranorum, quam modernorum numerus. Utraque enim pars ab omni tempore molles tantum partes pro *Gangrena* subiecto agnovit, veluti cutim, carnem omnem, ve- nas arterias, nervos, tendines, ex his autem imprimis ἀπὸ τοῦ τοῦ ἀνθρώπου τοῦ σώματος τοῦ σώματος Vid. Galen. l. de tumor. p. n. p. 1. c. 22. Cels. l. 7. c. 33. Peccett. l. 1. c. 3. Hildan. l. c. c. 1. Sennert. l. 5. p. 2. c. 19. *Sphaceli* vero subiectum præter jam dictas partes, ossa quoque esse, quorum in numero fortassis etiam cartilagines comprehenderunt. Qualemunque vero difficultatis spe- ciem præ se ferat nostrum hoc effatum, tantam tamen esse nequaquam existimamus, cujus veritas à nobis hoc loco non evinci deberet. Primo enim loco haud exigua reportandæ victoriæ spe inflamur, quando falso præsupposito contrariantium distinctionem superstructam esse vide- mus; putarunt enim illi, quod, quemadmodum non rarò magnæ inflam- mationes negligentius habitæ, comitem habeant *Gangrenam*: illæ au- tem mollioribus tantum competerent partibus, exclusis reliquis, sic etiam hanc, scilicet *Gangrenam*, illarum solummodo partium attributum esse, quæ inflammationibus æstum. p. n. conciperent. Deinde à vero etiam abludit illud, quando *Gangrenam* ab exterioribus magis partibus ad interiores, quam ab his ad illas descendere, plerique fere Chirurgiæ scriptores sibi persuasum habent. Quam omnia enim perpetuæ non sint veritatis, uberius jam nobis declarandum sumamus.

IIIX. Quantum ergo ad prius, cujus occasione magnam surgere vi- demus controversiam, an scilicet corporis nostri jam sæpius dictæ mol- liores partes, inflammationibus & apostematibus tantum corripiantur, an vero solidæ etiam, ut ossa, malis istis affligantur? non desunt pro utra- que sententia Viri doctissimi, qui partim affirmativam, partim negativam tueri sustinent. Inter posterioris sententiæ Patronos præcipuum cum so- lide docto Marc. Aurel. Severino tractat. de recondita abscessuum natura, reconditam sane doctrinam complectens, libr. de Padarthrocace. c. 3. deprehendi- mus Scrapionem Medicum Arabem l. breviar. c. 20. ubi hac falsa hypothesi ni- xus, ac si in illis solummodo partibus, in quibus fit tensio, sive distensio, apo- stema accidere possit, & è contrario in illis partibus, quæ distensionem in longum latum & profundum non patiuntur, in quem censum cerebrum, quia



quia frigidum interque alias partes præcipue currens, nec non os, quia similiter frigidum, siccum & valde durum est, refert, apostema suscitari impossibile sit. Ut adeoque Serapionis sententia hæc sit, quam Severinus in breviorẽ & commodiorẽ argumentationis formam hunc ad modum aptat. *Ea pars subdita est naturaliter apostemati, quæ distensionem in longum, latum & profundum recipit: At os distensionem non recipit; igitur neq; apostema.* Minori autem argumenti hujus propositioni ex Avicenn. l. 3. fen. 7. c. 1. cum Severino sequente occurrimus argumento, omnium, quorum ille, ex Avicenna, mentionem injicit, nostra opinione, palmario, cui propterea negando, nec Serapionem nec quemquam alium suffecturum arbitramur. Est autem hoc. *Omne quod nutritur, etiam extenditur, secundum singulas extensionis species. Jam vero ossa, quemadmodum reliquæ partes omnes, ita nutriuntur. Ergo quoq; extenduntur.* Quando vero cum superfluitate hæc nutritio accidit, apostema aliquod p. n. facile generari potest. Similem in modum Joh. Langius Epistol. Medicinal. l. 1. ep. 42. quo in loco circa controversiam hanc occupatus est, argumentatur. *Quicquid nutritur, inquit ille, crescit, augmentatur, aut influxus recipit, id quoq; putrescit aliquando, & apostematur. At ossa per omne ætatis tempus nutriuntur & resciantur, proinde apostemate quoq; distendi possunt.*

IX. Ossa itaque utut dura sint corpora, nihilominus tamen abscessus & inflammationes pati posse, per ea quæ jam dicta sunt, & dicenda restant, obscurum esse nequit. Et primò quidem, suffragante experientia prælaudati jam Severini assertum nostrum ulterius sic confirmamus. Ait enim ille l. 5. c. 11. *Si hanc (ossium intelligit compagem) ex allapsis humoribus semiputribus & alienis inflammari, ab inflammatione vero abscessum & corruptelam perpeti, dixerimus, non erit sane, qui refragetur, aut facilem vitij procreationem inficietur. Quæ res tamen ubi cuipiam difficilis fortè videatur, in promptu sum ostensurus, etiam opere constantes hos abscessus in plerisq; pueris à me visos, quibus extracta sunt ossium particula, quæ semiputres, quæ putres, confecta sanie, succiq; lentore maximo: quæ quidem putredo, (notanter dicit) quæso te, quo pacto fuerit inducta sine fervore, atq; inflammatione.* Verum regerat quispiam, Severino hoc in loco præcipuum sermonem esse de puerorum ossibus, utpote mollioribus. Respondemus, equidem verum hoc esse, ita tamen ut non profus etiam excludantur adulatorum ossa. Id quod præter alia ex hoc jam citati capitis loco manifestum reddit, quando inquit. *Sæpe numero legimus apud viros autoritate plenissimos, sensimusq; disputando constitutum, inflammari ossa, non quidem æq; sed paulo secius, quam carnes, ignis porro nullum sibi obiectum quantumvis durum excipit, quo minus in ipsum vim suam* *non exerat; ad hunc quoq; modum inflammatio, quæ ab internis vis-*

ceribus



ceribus male habitis, & à foco putredinis aliquo proficiscitur, nullam partem corporis excludit sua tyrannide atq; incurſibus, quin & dentes, quibus ignem parcere & immolitos linquere ſcripſit Plinius, quotidie cernimus inſenſili ſuccorum acrium inſeſtatu ſolvi, conteri & erodi: multo igitur potius oſſa minus compacta, minusq; ſentientia humorum acutorum vim ad languorem experiri ac perpeti debuerint. Idem hoc docent quoque Joh. Philipp. Ingraſſias tractat. de Tumoribus. Langius. l. 6. Alhardus Hermannus Cummenus in Miſcellan. Med. Phyſ. Academ. Nat. Curioſ. Anno Tert. Obſ. 112. ut & Galenus commentar. in aphor. Sect. 7. 54. ubi ſic refert, natura ſi robuſta fuerit excernendis ſuperfluitatibus, etiamſi craſſe fuerint, per anguſta foramina meatus parat, quando etiam per oſſa abſceſſus fieri Hippocrates docuerit.

X. Confirmari hæc videntur per ea quæ habet idem Galenus l. 6. de uſu Partium, quando ait, nullam ſubſtanciam adeo duram eſſe, ut ſicut nutritur, non etiam augeri poſſit p. n. (h. e. tumorem indeque oriundum abſceſſum admittere, interpretante ſic Mercklino in annotation. in Pandolph. de Spin. Ventof. c. 3.) ita ut oſſibus id quoq; uſu veniat. Maximè quoque huc facit, quod l. 6. Meth. Med. c. 5. oſſa το ἀνάλογον τῇ φλεγμονῇ, h. e. inflammationi quid ſimile perpeti, dicat, quod citatus modò Mercklinus de abſceſſu corruptorio, ſive eorundem Sphaceliſmo non malè intelligi poſſe exiſtimat. Diſtinctius hac de re iterum loquitur Avicenna l. 1. Fen. 2. Doctr. 1. c. 1. quando apoſtemata quidem membriſ accidere mollioribus ait, ſed eſſe etiam, cum oſſibus accidit res, quæ (nota!) apoſtemati ſimilatur, per quam ejus ingraſſatur magnitudo, & ejus augmentatur humiditas. Hiſce tandem omnibus accedit quoque conſenſus Celeberrimi Chirurgorum magiſtri, Paræi, qui l. 18. c. 26. & l. 11. c. 12. Oſſa iſſdem omnino morbis obnoxia eſſe perhibet, quibus eſt ſubjecta caro. Unicum ergò ſaltem adhuc reſtat, ut ſcil. ex eodem Paræo demonſtremus, quam non perpetuum ſit, Gangrenam ab exterioribus ſemper partibus ſua habere primordia, ſed ſæpius ab interioribus etiam erumpere, ut oſſibus, ceu jam ſupra indicatum fuit: locus verò Paræi videre eſt. l. 11. c. 12. Nec modo phlegmone inquit, ſed & caries & corruptio ſæpe oſſa primum & ab oſſibus initium ducit. Sic enim multos elephanticos & lue venerea infectos, cute & carnibus integros pulchroſq; videas, quorum tamen oſſa carie exefa & pertuſa, inſigni etiam ſæpe cum propriæ ſubſtantiæ jactura conſpiciuntur. Ratum propterea manet, quod quemadmodum ex hæcenus partim rationis, partim etiam auctoritatis & experientiæ allatis momentis conſtat, omnes omnino partes inflammari poſſe, ita quoque ſimiliter Gangrena & Sphaceli ſubjectum conſtituere. Sed obliſi ferè eramus teſtimonii, quod pro ſtabilienda magis adhuc noſtra ſententia ex Hildan. l. c. c. 4. in medium proferre lubet: expreſſis enim ille ver-



bis, immemor eorum quæ in definitione sua protulit, *nulli non corporis parti Gangrenam accidere posse* testatur. Cujus pronunciati veritas vel inde adhuc comprobare licet, quod Viz. solidæ corporis partes non in momento corrumpantur ita ut penitus mortificentur, sed paulatim & pedetentim, quando ergò ejusmodi pars nondum plenè & planè vitalis temperamenti passa est jacturam, non *Sphacelatam* sed *Gangrenatam* appellandam esse, omnium *Auctorum* stat sententia. Mallet autem fortassis quispiam, majoris distinctionis gratia, id quod nos *Gangrenam* meliorum partium esse diximus, in ossibus *Cariam* vel *Teredinem* nominare, quo in casu nemini quoque contrariabimur.

XI. Verùm, rogaret quispiam, anne ergò illæ tantummodò partes de quibus hucusque hæc qualiacunque fuerunt agitata, *Gangrenæ* & *Sphaceli* subiectum constituent? Ad quod quæsitum respondemus negando, tyrannidem enim horum malorum non solum externæ partes, quas vulgò artus & specialius organa apprehensoria & progressoria vocamus, cum reliqua corporis externa mole, experiuntur; sed nec illæ quoque, quas corpus, vel quo distinctius loquamur, ventres ambitu suo reconditas in cavernis suis arctissimè complectuntur, immunitatis privilegio gaudent; ipso ne quidem cerebro excepto, utut alias præ reliquis omnibus à provida natura singularem in modum ob officii excellentiam, osseo sepimento occultatum atque munitum. Si quis autem fortè rationibus nullam haberet fidem, is ad experientiam & tantorum virorum testimonia provocandus esset, quorum etiam facili negotio magno numero exempla huc referre possemus, si non tam pagellarum præsentium angustia, quam amici præsertim lectoris, cujus benevolentia hoc modo abuteremur, majorem haberemus rationem. His siquidem *Auctorum* referta esse volumina, nunc saltem sine ulteriore observationum talium enodatione, indicasse sufficiat. Quanta quanta autem mali hujus sit sævitia, si non majorem, tamen frequentiore, hanc, partes corporis internæ prædictis externis nostro experiuntur arbitrato. Illa tamen & Medici & Chirurghi operam sæpius eludit, partim quod non ita rarò per doctum etiam σοφόν p. n. harum vix assequamur statum, partim, quod licet in notitiam affectionum talium pervenerimus, partium conditio talis sit, quæ omnem respuat curam. Quales enim quæso feres suppetias, vel hepatis, vel lienis, vel renibus, intestinis aliisque; certè eousque si progressa fuerit *Gangrena*, æger à certa desperatione ad ullam salutem revocari nequit, nisi natura, optima alias morborum curatrix, indocta, nulloque usâ magistro, ipsis ægrotantis rebus doctè prospexerit. Cum ergò rarius & ferè nunquam de extirpandis interiorum partium *Gangrenis*

Chirur-



Chirurgis habeatur sermo, proinde nos quoque sepositis istis, in præsentis Dissertatione, de iis tantum quæ exterioribus corporis nostri partibus negotium facessere solent, erimus solliciti.

XII. Ad quam vero rerum p.n. classem *Gangræna* & *Sphacelismi* referri debeant, de eo altum apud plerosque *Auctorum* observatur silentium. Quando tamen in universum ferè tumorum doctrinæ, affectionum harum tractationem includunt, in horum quoque numerum, h.e. morborum malæ conformationis classem, tacito quodam consensu illas referri posse, judicare videntur: Id quod etiam præ aliis suprâ allegatus *Marc. Anton. Montagnana* expressis verbis, l.c. integro capite 4. defendere sustinet; quando ad hunc ferè modum argumentatur. *Gangræna* 1. non est morbus in intemperie, quia non curatur alteratione tantum sed ut plurimum evacuatione & abscissione. 2. non est in genere solutæ unitatis tantum: quia nec ulcus semper, nec unquam vulnus, aut contusio, aut fractura est. 3. ergo, reliquum erit, inquit, morbum hunc esse in magnitudine aucta. Verum posito, nondum tamen concessio, *Gangrænâ* ad secundam morborum classem spectare, per hæc tamen allata *Montagnanæ* argumenta, assertionis hujus veritas vix imò nunquam obtineri poterit. Prius enim quod attinet, falsissimum est, morbos intemperiei curari tantum alteratione, eo scil. sensu, quo alterationis vocabulum accipit *Auctor*, ita ut evacuatio alterationis gratia instituta excludatur. Deinde falsam quoque esse sequelam, quando sic concludit, non esse morbum intemperiei, ratio, quia curatur evacuatione, neminem latere arbitramur. Quando denique *Gangrænâ* abscissione ut plurimum exterminari vult, nulla prius facta distinctione inter eam quæ est incipiens & jam confirmata, quarum hæc ultima tantum expostulat ferrum, justo generalius notamus pronunciatum. Secundò, nullam iterum apparere connexionis rationem, non enim est de necessitate ut hæc semper sit ulcus, sufficit enim si semel aut iterum hoc contingat, quodcumque autem hoc fiet, tunc semper quoque erit in genere solutæ unitatis. Cum ergò præmissæ hæc non omni ex parte, vel saltem non semper sint veræ, facile apparet, ipsam conclusionem talem etiam esse debere; Viz. *Gangrænâ* non semper esse magnitudinis auctæ morbum. Patrocinator huic nostræ sententiæ *Vidus Vidius Medicus Florentin.* T.2. p.2. de curation. generatim. c.5. Ubi catenus *Gangrænâ* in magnitudine p.n. aucta consistere putat, quatenus ab eo ponatur inter tumores, quod tamen ipsum non perpetuum esse inquit, cum accidere etiam *Gangrænâ* possit parti non intumescenti, veluti cum sine ullo tumore refrigeratur, non tamen injuria referri inter tumores, cum magna ex parte tumorum vel magnitudinem, vel pravam curationem consequatur. Por-



rò, ipsemet laudatus modò *Vidius* subdubitat, an in morborum censum jure referantur *Gangrena* & *Sphacelus*, cum harum essentia interitu vitæ & caloris contineantur, quandoquidem morbus perinde ac sanitas affectio sit eorum quæ vivunt. Verum perplacet ejusdem responsum, quod scil. tunc in morbis ponatur, cum pars nondum emortua, nec calor in totum sit extinctus, & morbum esse illius partis quæ affecta est. Ubi autem jam penitus extincto calore, pars emortua est, morbum tribui parti vivæ, qua cum nescitur illa, quæ mortua est, referrique tunc ad numerum, cum aliquid desideretur ex iis, quæ abesse naturaliter solent, scilicet pars emortua, cum enim non vivat, amplius etiam non esse, vivere namque juxta *Philosoph.* viventibus est esse: quemadmodum autem deest quod prius vivebat, ita superesse putat contra naturam quod est emortuum. Ad temperationem autem immoderatè frigidam pertinere, cum calor nondum in totum extinctus sit, imò nos hanc semper esse conjunctam arbitramur, non rarò etiam calidam, præsertim verò ab initio. Ex quibus omnibus tandem collectim sumptis, sequentem cum *Vidio* formamus conclusionem. Ergò, *Gangrena* est morbus qui nunc consistit in intemperie, nunc in numero p.n. vel aucto vel imminuto, sæpe etiam concurrente magnitudine aucta & tumore contra naturam.

XIII. Ordinis ratio nunc postulat, ad ipsam causarum tractationem progredi. Verum cum *Gangrene* & *Sphaceli* naturam modò minore, modò majore, vel etiam absoluta temperamenti vitalis destructione, absolvi dixerimus, à scopo nostro nequaquam alienum futurum esse existimamus, ante omnia in majorem argumenti hujus illustrationem, quo deinde causarum felicius fluat enucleatio, de partium corporis nostri integritate, seu ut rectius dicamus vitalitate, obiter saltem, quædam in antecessum proferre; sanum enim nosse decet, ut ægrum noveris. Vitæ ergò nostræ conservationem, naturaliter sustentatione caloris seu ignis temperati in corde, perpetuò excitandi, unaque cum sanguine in corpus universum distribuendi, continuari, ex ratione sensuum autopsiæ suffulta, docemur. Singulæ enim corporis nostri partes quicquid habent caloris, cordi debent, cujus perpetua vibratione sanguis vitalis mediantibus arteriis partibus impellitur, unde vivificantur, id est, ad varias & multiplices actiones vitales, redduntur aptæ. Rem verò in dispensationis hujus negotio ita se habere, vel ex eo discimus, quod partes omnes modò magis modò minus caleant, scil. quod cor nunc majorem vel minorem sanguinis calidi copiam transmittat, referente absolutissimi ingenii Viro, *Hermanno Conringio*, in libro magna & multiplici doctrina referto, de *Calido Innato, seu Igne animali*. Qui ibidem quoque exponit, quo modo trans-



transmissio hæc, pro cordis motu fortiore aut debiliore vel ignis etiam gradu nunc intensiore, nunc remissiore, variet. Calefactionis vero modum quod attinet, duplicem cum eodem *Conringio* fundamenti loco præsupponimus, mediatum scil. unum, immediatum alterum. Hunc, dum corporis nostri partes etsi ipsæ actu non caleant, potentia tamen magis minusve sint calidæ, hinc etiam contentum suis vas sanguinem calidum, dum per partes calefieri aptas decurrit, producere immediatè in proximo per omne corpus aliquem calorem. Illum, quando vapores calidi omnia vacua corporis spatia, magna copia pervagantes, (quos cernere esse ait, si animalis vivi ventrem aut pectus tempore hyemali aperiatur) carnem, aliasque vivi animalis partes in tumorem aliquem cum calore conjunctum, agunt; quod etiam exinde manifestum esse putat, quando in deliquio animi, aliisque frigidis cordis affectibus, subitò omnia flaccescant, tumorem ergò ejusmodi vividum nequaquam à substantia aliqua solida derivandum esse concludit. An verò solus hic influens cordis in partes calor, functionibus animalibus sufficiat hic disquiri posset. *Conringius qui l.c. c.19.* prolixius quæstionem hanc tractat, affirmativam tueretur, certissimumque hujus rei experimentum esse putat, quod simulac vel vehementer est debilis, vel planè occidit natus ignis cordis, vel quando ab illo nullus calor ad partem pervenit, mox nullum supersit calidum animale in partibus corporis à corde distinctis. Impossibile enim esse inquit, adeò citò illud partium calidum interire posse, si quod habeant sibi propriam partes, quodque à corde non sit mutuo acceptum; commentitio ergò aliquo secundo partibus connato, haud opus esse. Quæ *Conringij* sententia utcumque dura & communi fere *Auctorum* doctrinæ repugnans nobis fuerit visa, non potuimus tamen quin re prius probè pensitata, Eruditissimo huic *Viro*, à quo alias non ita facile diversum quid sentientes discedimus, etiam in hoc nostrum præberemus assensum.

XIV. Quamdiu ergò sanguinis laudabilis, calidi, spirituosus fluxus & refluxus ad partes corporis cætera sanas, continuatur salvusque permanet, tamdiu quoque harum vitalitas illæsa subsistit. Quamprimum verò unum aut alterum horum requisitorum cessat, hanc è vestigio quoque labefactari necessum erit. Nos itaque his ad hunc modum præmissis, impræsentiarum genium causerum *Gangrenam* & *Sphacelum* constituentium, indagare conabimur. Monendum tamen ab initio statim Lectorem esse duximus, nobis hic loci non tantum de illa *Gangrenæ* specie, quæ inflammationibus majoribus, vel negligentius habitis aliis, comitem se præbere solet, cujus etiam præ cæteris magis apud Chirurgiæ scriptores mentio fieri assolet, sed & de reliquis, quæ foro in medico interdum



Chirurgis obviam venire solent, futurum esse sermonem. Hanc verò caufarum tractationem allevabat prima statim fronte unanimus *Auctorum* consensus, plerique enim quos nos saltem versabamur, quoad caufarum numerum inter se conveniebant, ita ut cum *Galen. l. de cur. rat. per sangu. missionem: & libr. de caus. morbor. c. 3.* quinque allegarint modos, quibus calorem nostrum nativum destrui posse putarunt. Præ cæteris autem, modos prænominatos dilucidè admodum more suo nobis exposuit, *Melchior Sebizi*, Æternum Academiae nostræ decus, quippè qui orbi & urbi profuit diu, & sera usque in tempora adhuc profuturus est multis, in *Prodr. Exam. Vulner. part. 2. thes. 174. & seq.* ubi nominatim singulos recenset. Ab hac caufarum distributione non multum quoque discrepat ea quam *Hildan. l. c. c. 3.* habet, quando triplicem harum classem constituit, semperque unâ ex his, partes corporis mortificari asserit. Scilicet *Primò*, aut ex vehementi alteratione qualitatis manifestæ, qualem esse dicit intemperiem calidam, frigidam, humidam & siccam. Aut *Secundò*, ex qualitate occulta, seu materia maligna & virulenta, sive corpori congenita, sive extrinsecus contracta, quæ tota sua substantia corrumpere innatum calidum spiritusque interficeret. *Tertiò* denique, ex spirituum maximeque vitalium suffocatione aut interceptione. Omnes verò has causas prout magis vel minus violentæ, *Gangranam* primò, & si illis non dextrè occurratur, *Sphacelum* tandem quoque procreare. Quemadmodum vero dictos *Auctores* in caufarum numero, ita quoque in earundem declaratione, seu modi agendi expositione, constanter iterum conspicientes deprehendimus: quantò autem magis arridebat consensus prior, tantò magis nunc displicet hic posterior: & quam spem felicioris progressus afferebat ille, eandem illam hic jam iterum adimit. Vix enim unum aut alterum ex tot reperies qui voto & expectationi responderet. Quicquid sit, non tamen propterea tam graviter tantos viros de re medica optime meritos, vel dicere vel accusare multo minus eorundem inscitiam increpare addecet: quemadmodum id fecisse inque hoc genere plus quam nimium peccasse animadvertimus *Dn. Cornelium de Bonrekoe* in exstructo suo novo Chirurgiæ ædificio, quod conviciis ferè plenum, inque tantorum virorum ignominiam unicè præmaturo ardore fabricatum esse videtur, ridendo tamen conatu, cum nec ipse in toto suo opere, meliora erudito proferat orbi, quanquam tale quid alio quodam volumine promittat: confidat tamen pollicitationibus ejus alius quispiam, ego mallem videre quam sperare; vereor enim ne fides illius expectationem nostram frustretur. Peregregiè sanè quadrat in ejusmodi farinae homines *περὶ ποιότητος* Viri cujusdam, quem animi candor non minus quam prudentia,



tia, summa etiam ejusdem eruditio, venerabilem nobis semper reddidit, scil. nimium intelligendo facere ut nihil intelligant, seu singularis scientiæ affectatione omnia confundere. Quam vero hæc ab omni injuria sint aliena, ex sequentibus cuilibet, melius autem ex ipsis hujus *Viri* scriptis innotescere debet.

XV. Pandamus ergò vela discursus nostri, fiet fortassis ut felici ausu prædictas difficultates superemus. Ab initio autem melioris distinctionis gratia more nobis recepto, causarum seriem in duas classes dividere lubet, quarum externas una, internas altera complectatur. Has iterum in immediatam sive proximam & mediatam proximorem & remotiorem distinguendo. Quantum ad priorem, dissentire inter se videntur *Auctores*, quando nonnulli pro immediata causa agnoscunt inflammationem, alii putrefactionem vel simplicem vel cum maligna qualitate conjunctam. Verum omnes hi malè distinxisse videntur causam antecedentem & effectum seu rem ipsam à sua causa. Inflammatio enim causæ proximæ locum tenere nequit, cum sit antecedens, nec putrefactio, quia est consequens seu res ipsa cujus causam scrutamur. Dicimus proinde causam immediatam esse destructionem balsamici & ineffabili ratione modificati nostri caloris nativi, majorem minoremve pro differente *Gangrenæ* statu, omnimodam verò in ipso *Sphacelo*. Hujus enim influxus cessatione, mirum sanè est quam accelerato gradu partes quæ hucusque salvæ & integræ persistebant, fœda putrilagine dissolvantur.

XVI. Verum indignabundus mox prorumpit *Dn. Bontekoe l.c. c.4.* nos scil. eundem errare errorem, quem modò in aliis notavimus, quando nimirum antecedentem & consequentem causam à se invicem non probè discernamus. Vult enim ille cum *Commentatore suo Dn. Albrecht in annotat.* destructionem caloris vitalis non esse causam mortificationis, sed cessantem sanguinis motum, tam intestinum quam progressivum, paucis, humorum stagnationem, quam caloris nativi dispendium tanquam effectus suam causam insequatur. Quo evidentiora hæc reddantur, verba *Dn. Bontekoe* ex Germanico Idiomate in Latinum sermonem translata huc referamus, quæ nisi fallor sic sonant, quando inquit, debilitatum calidum nativum, quod juxta Doctorum nostrorum sententiam, quatuor partium elementa continere amplius nescit, causam existere mortificationis, merum esse figmentum omnique veritate destitutum, haud secus ac si propositum fuisset ab homine quodam, gangrænato intellectu laborante. Verum equidem esse, pergit, quod in *Gangrenata* parte nec vita nec calor, quæ duo tamen ante mortificationem adhuc aderant, amplius supersint: hanc tamen debilitatem non causæ, sed effectus



stus rationem habere: Doctores nostri ait, rationem exponere debuissent, quare in mortificata parte calor ejus natus evanescat. Verum enim verò, concessio dicti caloris jacturam, stagnantium humorum esse effectum, nondum tamen apparet qua vi quis argumentari posset, quia est effectus, ergò nequit esse immediata & proxima alterius cujusdam rei causa, sanè nullam videmus argumentationis hujus vel connexionem, vel fundamentum. Deinde nondum probatum esse videmus ab *Auctore* nostro, nec ab ejusdem *commentatore* *Dn. Albrecht*, jam sæpius allegatum ablatum sanguinis motum, causæ proximæ locum obtinere: contrarium potius tam ex ipsius *Auctoris* argumentandi methodo, quam ex ratione quoque elici potest: Siquidem si firmo stat talo, quod *l. c. c. 4. art. 8.* dixit, prohibitam transpirationem insensibilem, *Gangrena* causam haud posse constituere, eò quod non in momento illam cito insequatur pede; firmiter longè nostrum hoc erit assertum, quod scilicet cessans humorum motus, utpotè quem non in momento excipit *Gangrena*, pro causa immediata venditari nequeat. Confirmat etiam illud nostram præprimis sententiam quod in citato loco de causa procatarctica, hic vero de proxima habeatur sermo, qua posita, poni quoque effectum necesse est: sed cum ex allegatæ jam causæ præsentia, effectus qui est *Gangrena*, neutiquam sequatur, saltem in momento ut *Auctor* vult, non erit proinde hujus causa immediata. Contrarium denique, ipsa etiam suadet experientia, quis enim est qui nesciat in sugillationibus, à contusione sæpè graviore, aut aliis de causis exortis, humores per dilacerata vasa effundi, non tantum intra cutim sed ipsam musculosam partium substantiam satis diu stagnare, cum varia variorum colorum cutis descriptione, donec sensim atque sensim, insensibili transpiratione vel alio quodam modo expellantur, nullo vel præsentente neque consequente *Gangrenæ* indicio. Si ergò jam interceptus humorum motus, causam proximam constitueret *Gangrena*, hujus sanè ferociam in allegatis exemplis non tam facile declinare possemus. Nihilominus tamen hæc quæ dicta fuere non ita volumus accipi, quasi in totum inficiaremur, *Gangrenam* natales suos nunquam ex subsistentibus humoribus habere posse, sed quod humores ita comparatos non immediatæ, sed mediatæ proximioris causæ titulo denotandos esse, existimemus.

XVII. Rata proinde manet hætenus nostra de proxima *Gangrenæ* causa, sententia. Variam verò hæc iterum agnoscit genesin, ita ut enarrandis modis quibus partium incolumitas deturpatur vix quisquam suffecerit. Usque adeò verum manet, universum hunc mundum in salutem æquè ac perniciem caduci nostri corporis, omnibus suis partibus prom-



promptum atque paratum existere. Nos hoc in loco earum solummodo causarum, quarum in foro medico frequentior solet esse observatio, mentionem instituturi sumus. Præ reliquis verò omnibus notari meretur ea quæ *Dn. Bontekoe, th. præc.* pro immediata, nobis verò pro mediata proximiori venditatur, ablati *Viz.* humorum motus, tam intestinus quam circularis: Subeunt enim mox corruptionem humores subsistentes, ceu quorum præcipua salus ex solo motu dependet. Fidem huic sententiæ firmat, *Cornelius Consentinus*, quem tamen nunquam allegassemus, eò quod perperam & non prout equidem hominem literatum, quique sibimetipsi non admodum videtur insipiens, deceret, de Medicis & Medicina ferat judicium, nisi apprimè huc facerent, quæ habentur *progymnas. 7. p. m. 305.* quando sic inquit, *Ex his &c. facile intellectu est vitam in continuata & perenni sanguinis motione consistere. Quippè tam diu vivimus, quamdiu sanguis in corde calefcens vitali q̃ halitu animatus per arterias & membra diffunditur: hinc autem partium omnium vis & salutaris calor existit. Quapropter si membrum aliquod, vel corpus universum hujusmodi influxu deficitur, protinus inalgescit, emoritur ac demum putrescit.* Subsistit autem sanguis vel in vasis, quantitate & qualitate modum excedens, per causam tam internam quam externam. Hæc, quando nimia sua crassitie seu lentore sibimetipsi præcludit fores: Illâ verò, dum variis modis externis, ejus per vasa inhibetur motus, de quibus tamen pluribus infra. Vel subsistit etiam extra vasa, à qualicunque horum apertione, quæ contingit vel propter nimiam à copioso aut rarefacto etiam sanguine, flatibusve, distensionem; vel propter humorum aut in vasis aut extra illa subsistentium acrimoniam corrodentem, sive denique à re dura & acuta vulnerante, aut 'quovis alio id tandem fiat modo, prædices semper parabitur inflammationum messis; quæ cum præcipuam *Gangrænis* præbeant occasionem, neutiquam nos operam lufuros esse arbitramur, quando animo paulisper attentiore illarum naturam perscrutari, nobiscum constituimus; præsertim cum præter allegatam causam, prævisa etiamnum adversariorum quorundam tela, argumenti quoque hujus dignitas, explorationem talem haud dissuadere videantur.

XIIX. Ex Veterum hypothese causa inflammationis proxima statuitur perversus sanguinis affluxus, seu qui ἀπό & contingit: hujus autem impetuosioris motus causam, sanguinis modò abundantiam universalem, quam plethoræ nomine insignivère, modò acrimoniam, modò dispositionem partium tractoriam, à calore aut dolore dependentem accusabant. Sed prætereo jam ostendere, quibus difficultatibus hæc Veterum doctrina sit implicita, si vel maximè ex illorum etiam hypothese



disputare vellemus. Veritati propius accessit superiori seculo *Vir Experientissimus*, ingeniique felicitate *Clarissimus*, & ob sermonis elegantiam aliàs *Elegantissimus* dictus, *Dn. Fernelius*. l. 7. de *extern. corpor. affect. c. 2.* ubi inflammationem à sanguine, non in solam cutim, sed & in subjectam carnem impacto, & ex venis eo confluente, ortum habere asserit, *quum enim*, inquit, *venæ arteriaq̃, majores immoderata sanguinis copia distenduntur, tunc gravata in minores quasi onus deponunt, ex his demum in minimas, ac rum per minima oscula, perq̃, tunicarum meatus sanguis non cohiberi potis; effluit ac in vacua elabitur spatia, quæ inter fibras sunt primorum corporum, præcipue muscutorum, venarum, arteriarum, nervorum atq̃, membranarum.* Hæ partes fluxione dum perfunduntur implenturq̃, distenta copia quasi divelluntur, *ferventisq̃ sanguinis ardore incandent, vel in cute prominent.* Ex quibus patet omnem inflammationis causam, sanguinis defluxioni vasa distendenti *Dn. Fernelium* attribuire & plethoram pro distensionis causa unica habere. Verùm vix adduci poterimus ut credamus, omnem inflammationem à sola sanguinis copia suam trahere originem. Ratio namque cum experientia diversum quid docere videntur. Ponamus enim, plethoram non esse merè quid imaginarium, clarum interea nondum redditur, quomodo vasa motu suo eousque distendere queat, ut hæc præ nimia extensione rumpi necesse habeant, non interveniente alio quodam impetu, operâ suâ priorem adjuvante. Accedit & illud, quod *Dn. Fernelius* sic nullam potuisset reddere rationem, quare tantum hæc vel illa & non plures partes simul, inflammationibus incalescerent, dum in toto corpore sanguinis ille nisus concipiatur æqualis: Ut jam nihil dicamus de vacuis allegatis intra musculos, venas, arterias, nervos atque membranas, spatiis, ceu merè imaginariis, docente sic *αὐτοψία*.

XIX. Has ergò & similes difficultates cum perspexissent moderni seculi Medici Philosophi, aliâ rem aggressi sunt viâ, quam fausto quoque conatu mox invenerant; quod equidem haud mirum alicui videri debet, præeunte *Viz.* nunquam intermorituro Anglorum *Sydere*, *Harvæo*, qui suo omnium hucusque inventorum celeberrimo pariter ac in foro medico utilissimo, sanguinis *Viz.* motu circulari, glaciem jam fregerat. Quamprimum enim dictus sanguinis motus literario innotuit orbi, pluribus & maximis foro in medico agitatibus controversiis, magnum affulgere cœpit lumen. Qui tamen motum hunc sanguinis progressivum, per vasorum anastomoses seu mutuas inosculationes fieri sibi fingebant, sicuti in reliquis, ita præsertim in explicanda inflammationis natura, se expedire vix poterant. Alii verò, quibus hæc per anastomoses suspecta videbatur sanguinis transvasatio, ex ratione alium meditati sunt



sunt motum, qui scilicet per ipsam porosam partium substantiam institueretur, quem etiam postea ceu naturæ convenientissimum, ipsâ experientiâ comprobantur. Præ cæteris autem præclare admodum in exponendo inflammationis negotio se gessisse arbitramur. Dn. Isbrand. Diemerbræck, magna ingenuitate Virum, utpotè quem non puduit præterito anno, posteriores cogitationes prioribus ceu meliores præferre, atque sic *παλιωδῶς* canere, l. 2. Anat. corp. human. c. 8. ubi in defensionem suæ sententiæ hoc modo effatur. Non est quod à sanguine extra arterias in substantiam partium effuso, metuantur tumores, inflammationes, putredines, apostemata &c. nam propter arteriolarum in substantiam desinentium angustiam, non plus influit quam per poros commodè transire & à venarum osculis rursus imbibiri potest. Et paulò post inquit, verum si pori, vel à contusione, vel à subita refrigeratione, aliave causa angustiores evaderent, aut sanguis in partibus crassior fieret, quam ut venularum angusta orificia subire posset, tunc brevi tempore nimia ejus copia (nam influxus per arterias continuè procedit) in partium substantiam cumlaretur, atq; dicta mala statim generarentur. Hæc enim est vera & frequentissima omnium inflammationum cum tumore causa. Tandem quoque addit, non considerant, sanguinem totum per vasorum anastomoses non transire, sed majorem ejus quantitatem in poros substantiæ partium impelli; è quibus si non satis citò redundans quantitas in venas profluat, ob causas supra dictas, tunc necessario fieri tumorem, & quia singula affluentes guttula arteriosi sanguinis conferunt suum calorem, hinc à sanguinis in parte nimio augmento fieri nimium augmentum caloris, & ab hoc intenso calore fieri sanguinis cumulati effervescentiam, partisq; inflammationem cum tumore. Miramur quod non addiderit, & consequente dolore atque renitentia. Et tantum quidem de inflammatione cum tumore conjuncta, quomodo verò se res habeat, quando est sine tumore, saltem notatu digno, porrò inquit. Inficias tamen non eundem esse, ait, illam effervescentiam interdum etiam posse fieri à paucis, sed acris & ad turgescentiam prono sanguine in aliquam partem effuso, tuncq; fieri inflammationem sine insigni tumore, ut in erysipellate. Hactenus ergò Dn. Diemerbræck. Non est autem ut in his quæ fuerunt dicta explicandis simus prolixiores, satis enim propria luce radiant, omnemque de inflammatione doctrinam absolvunt. Insuper clarum quoque ex his esse putamus, unam eandemque Veteribus æquè ac Neotericis de causa materiali fuisse sententiam, quam omnes unanimi consensu sanguinem esse, professi sunt, qui prout differentis esset qualitatis vel substantiæ, differentes quoque constitueret inflammationum species.

XX. Verum quum hinc inde, inter Philosophos non minus quam Medicos, ex Cartesiana Philosophandi methodo depromptum gliscat



principium, (an utile magis vel necessarium, quam curiosum, jam non disputabimus) dubitationem videlicet de omnibus rebus in vita instituendam esse semel: In dubium quoque non ita pridem à quibusdam vocatum fuit, num scilicet sanguis pro inflammationis causa materiali habendus esset, nec ne? id quod negarunt *Dn. Bontekoë*, ejusque commentat: *Dn. Albrecht*, & recentior quidam diligens scriptor *Stephanus Blancard*, omnes tamen nomine potius quam opere *Cartesii* magistra. Quorum posterior in libro nuperè edito, sub titulo *Neue Kunst, Kammer der Heil. Kunst. l. 3. c. 2. art. 5.* an modestè? judicem agat alius, ridiculum & puerile esse pronunciat, dicere velle, sanguinem constituere inflammationum causam materialem. Rifu verò adhuc magis dignam esse putat illam opinionem, quâ asseritur inflammationum causam procatarcticam existere plethoram. Verùm periculum imminet ne in explananda boni hujus *Viri* sententia, cui ferè omnia Veterum placita ridicula floccique pendenda esse videntur, illam ipsam rifui Benevolo exponamus Lectori: Dispiciamus ergò num re ipsa diversum quid ab iis, quæ jam à nobis fuere proposita, *Dn. Blancardi* præ se ferat doctrina. Unico autem argumento, vanitatem communis de inflammatione sententiæ, evicisse præsumit, quando inquit, videre esse indies, sanguinem equidem extravasari, cutisque nitorem maculis lividis, nigricantibus, fœdari, præterquam quod inflammatio insequatur, & sanguinem hunc evanescentibus particulis humidis, coire & exsiccari, sique hujus supra modum copia ex vasis destillaverit, tunc corruptionem subire & vicinas lædere partes.

XXI. Alterum verò Veterum de plethora placitum, quod non minorem quam prius, nauseam ei movisse videtur, sequentem ad modum magnâ sanè veri specie destrui posse, sibi persuasum habet; movendo quæstionem, an scil. non repugnet, fingere sibi inflammationem in macilentis, quique angusto sunt pectore, ceu in quibus nihil minus quam plethoræ deprehendantur vestigia? *Secundò*, idem proponit dubium, quod nos supra *Dn. Fernelio* objecimus, unde nimirum sit, quod juxta hæc principia talismodi inflammatio non plures partes simul offendant? Tandem quoque vult, plethoræ existentiam nondum firmiter esse stabilitam, nam quod communiter pro plethora divendi solet, nequaquam talem, sed ut plurimum liquorum esse inspissationem, ita enim loquitur, qui humores deindè quum minima vasorum per meare amplius nequeant, in majoribus subsistunt, eaque cum aliquo languoris sensu distendunt. Hæc sunt argumenta *Dn. Blancardi*, quibus receptam de inflammatione sententiam evertere conatur, cum verò ipsa, qualia sunt satis se prodant, obiter tantum unum aut al-

terum



terum ad ea monendum esse duximus. Primum ergò quod attinet, nequaquam illud sufficiens existere arbitramur, ad probanda ea quæ quidem probare debuisset. Si enim sanguis in minori tantum copia extravasetur, ipsimet non statim pro inflammatione habemus, saltem effatu dignâ quamprimum verò ex causa vehementiori, dictus sanguis finibus suis excesserit tunc demum sicut ipse *Auctor* fateri necesse habet, dum corruptionem subit, vicinas offendere partes: Sed liceat nobis veniâ *Dn. Blancardi*, quærere, quamam ergò in re consistat illa partium offensio? subterfugio certè nullus hic dabitur locus. Alterum verò ejus argumentum minoris adhuc est momenti: Valdè enim impingere nobis videtur, quando vult Veteres plethoram unicè pro causa inflammationum agnovisse, quam longè enim hoc à vero recedat, illorum Codices abundè satis testantur. Hoc tantum voluere Veteres, plethoram inflammationibus occasionem quasi præbere: Undè etiam evanescit & illud, quando quæstio erat, si plethora inflammationis causam constitueret, cur ergò non omnes partes simul nimio sanguinis exæstuarent affluxu? Ad quod quæsitum reponimus, singulas corporis partes inflammationibus equidem aptas natas esse, prout tamen hæc vel illa majorem à causis tam internis quam externis vim sustinet, nunc magis nunc minus inflammari. Quando autem porrò quærit, qua de causa in iis qui rarioris texturæ, seu qui gracili sunt corpore, in quibus nihil minus quam sanguinis redundantiam invenire esse, existimat, inflammationes accidant? satis se prodit, quod falsa de plethoræ natura, ducatur opinione. Et si vel maxime tandem, nullam indictis corporibus concederemus sanguinis exuperantiam, exindè tamen nondum concludere liceret, ergò inflammatio non est ex sanguine vel saltem ex ejusdem abundantia, quatenus jam ante indicaverimus, quam falsè *Dn. Blancard.* Veteribus obtrudere voluerit, quasi causam hanc ceu inflammationum agnovissent unicam.

XXII. Obscurum ergò non est, *Auctorem* equidem nostrum, communem de natura inflammationum sententiam, diruere conatum fuisse, ipso tamen opere nihil minus præstitisse, quod præter dicta jam argumenta, vel ex propria ejus sententia, quam conceptis verbis *l. c. cap. cit.* proposuit, elucere debet. Cum itaque, ait, sanguis inflammationem non constituat, nostrarum erit partium, rationi magis congruas & verisimiliores in lucem proferre. Si ergò succi vel humores corporis nostri, frigore aut alia quadam inspissentur causa, certum est quod tam commodè amplius moveri nequeant, quàm dum fluxilitate pristina adhuc gaudebant. Inspissati autem hoc modo humores, varias hinc indè causantur vasorum obstructions, crassiores namque partes, cum per tam an-



gustos meatus cursum suum dirigere nesciant, subsistere coguntur. Hic propterea liquor (sanguinem intelligit) cum hoc modo naturam suam exuat, in inflammationem & effervescentiam degenerat, h. e. alkali & acidum accelerato subtilis materiæ motu in se invicem agunt reagentque; ubi verò est motus minimarum particularum vehementior, ibi quoque est ignis, aut potius æstus seu fervor quidam, major vel minor, prout scilicet compressio globulorum cœlestium magis vel minus superari potest: Hactenus per interpretationem *Blancardus*. Utcunque autem hanc ejus opinionem cum animo agitaverimus, novam sanè nequaquam deprehendere licuit, vulgatæ ergò etiamnum inhæret, quam saltem dum ex infirma in Medicina hypothesi, *Cartesiana* scilicet, nimio gratæ novitatis studio dilucidare cupit, obscuriorem potius quam verisimiliorem reddidit. Qualis qualis autem hæc sit, non ex propriis ejus scriniis sed ex *Praxi Med. Dn. Sylvij* mutuata hanc esse sententiam ex instituta invicem verborum collatione, cuilibet facile innotescet. Hic enim l. c. c. 4. sic loquitur. *Arbitror autem incendi ac inflammationem parere sanguinem, quatenus ex ipso in vasis suis valde distinctis, partibusve quibusvis aliis subsistente, h. e. stagnante mox incipiant evanescere partes spirituosæ magisq<sup>3</sup>, volatiles, ac subtiles, tum acidæ, tum salinæ temperare solitæ; unde utraq<sup>3</sup>, acriores factæ, acrius in se mutuo insurgunt, effervescentiam ob partes sanguinis oleosas præsentis calidam excitant, quin paulatim sanguinem ita corrumpunt, ut in pus vertatur, & quidem pro sanguinis corrupti varietate plane varium.* In hoc tamen ultimo novam iterum commovet dissensionem *Dn. Blancard*, quando illud æquè ac prius falsum esse perhibet, pus *Viz.* ex sanguine confici, sed verum chylum pro parente suo agnoscere; quam autem nullis rationibus neque argumentis confirmari possit ficta hæc sententia, quam procul adeoque à vero absit, suo loco prolixius demonstraturi sumus.

XXIII. Verùm regeret quispiam, hanc *Dn. Blancardi* sententiam, non de sanguine quâ sanguine, sed de acescente portione chylosa in eo adhuc existente nondumque perfectè in sanguinem immutata, intelligendam esse: Cui sententiæ, *Dn. Bontekoe & Albrecht* addictos quoque esse constat, quorum *Hic* rem exemplo ex chymico fonte desumpto, illustrare contendit, scil. eodem & simili modo rem se habere cum chylo & sanguine extravasato, ac se habet in commixtione olei vitrioli cum oleo tartari. Ast cum hæc talia consignabamus literis, unaque objectionem meditabamur, opportuniorem vix memoria suggerere poterat eâ, quâ aliquando usum fuisse meminimus, *Virum Magnif. Ampliſſ. Excellentiſſ. atque Experimentiſſ. Dn. Doctor, Marcum Mappum, P.P. Archiatrum Celeberr.* (Qui cum stabili & haud vulgato favore omnem studiosam prosequatur ju-



ventutem, omnique animi impetu commodis hujus invigilet, Ejus semper cum quodam singularis lætitiæ sensu recordor,) non in absimili admodum occasione, quando nimirum in disspntat : privato publicis de Febribus & in specie de harum Causis, sermo nobis habebatur, ubi quæstio incidebat, num secundum Recentiorum quorundam doctrinam, fermentum peregrinum, seu chylus justo acidior, qui sanguineæ massæ infusus, illi extraordinariam agitationem inducit, sicut oleum vitrioli si oleo tartari commisceas, pro causa febrium unica habendus esset? Reponebat *Vir* omni virtutis genere *Exornatissimus*, non satisfacere eos. 1. Quod sic vix probari possit ex illorum hypothese, quomodo febris vel fiat, vel continuetur, ubi nullus chylus. 2. Quod nulla hætenus protulerint indicia, esse inter sanguinem & chylum acidiorē talem repugnantiam, qualis est inter oleum vitrioli & oleum tartari aut similia. Quas ergo ambas *Viri* prælaudati responsiones, peraptè quoque in præsentī nostra materia, mutatis solummodo mutandis quadrare arbitramur.

XXIV. Illud quoque hoc loco prætereundum non est, quam non minus falsa nitatur opinione, nominatus jam sæpius industrius *Auctor* de loco ut & de inflammationum symptomatibus, ostendere. Siquidem tantum in arteriarum ramulis minoribus illam contingere voluerit, exclusis venis, duobus præcipuè fretus argumentis. *Primo* enim, dum materiam phlegmonis non sanguinem, sed substantiam quandam chylousam & lacteam esse voluit, quæ cum non nisi in arteriis existeret, ipsum quoque incendium in his tantum excitari posse, statuit. *Secundo*, quando à conformatione vasorum argumentum desumit, hoc magnam admodum veri speciem præ se ferre existimat; arteriarum quippè structuram talem esse, quæ ex amplo principio in angustum desinat terminum, hacque ratione quoniam humor crassus dum angustias illas permeare nequit, ibidem subsistendo oppilationem parere. Secius verò longè se rem habere cum venis, ceu quæ in principiis angustæ, in progressu verò magis magisque amplientur: Hinc ita ratiocinatur, humorem qui arteriarum minimas liberè transiit, in venis subsistere non posse, quarum scil. capacitas non sit minor quam arteriarum, & quod illæ ex termino angusto exeant in ampliorem, secus quam hæ. Verum præter ea quæ jam ante in medium prolata fuere, & falsitatem prioris argumenti sufficienter satis arguunt, illud saltem hic addere lubet, quod nimirum si vel maximè concederetur aliqualis chyli in sanguine præsentia, nondum tamen appareat, quæ sit illa secernentis hunc ab illo naturæ sagacitas. Posterius verò argumentum, quod *Auctor* ex mechanicis potius principiis, & statu corporis secundum naturam constituti, quam ab experien-



tia defumpfit, per hanc quoque satis subvertitur. Doctrina enim hæc merè imaginaria, non omnes præsentis argumenti partes complectitur; dantur siquidem plures inflammationes, quas nequaquam ex prænominata hypothefi explicare licet. Deindè, quid obftet quo minus similem oppilationis facilitatem in extremis venarum ostiis concipiamus, non videmus. Sed porrò instabit *Dn. Blancard*, obstructions equidem venarum permittens, nulla tamen insequente inflammatione, quod nullus in his inveniatur chylus. Expendendum autem ei relinquamus ulterius, num non ex propria sua hypothefi de existentia chyli in sanguine arterioso, aliqualem etiam ejus præsentiam licet obscuriorem in venoso evincere quispiam firmiter posset? Quod vel ex hoc manifestum redditur, quando perpenderimus, quomodo non omnis chyli massa unica circulatione vel in nutrimentum transeat, vel etiam in sanguinem mutata, à calore nativo depopuletur; testante præprimis experientia, quâ ex vena sive hominis, sive bruti animantis, paulò post pastum sanguine levata, edocemur, totam massam rutilante suo colore multis modis superare illam quæ jejuno depletur corpore, quippè quæ longè nigricantior magisque jam addensata. Nullatenus præterea patet, quare quis tantum in minimis & extremis arteriarum ramulis aliquam chyli præsentiam mente sibi fingere posset, qua carerent venæ. Suspenso quoque animo ex *Dn. Blancardo* scire anhelamus, quidnam illud sit, quod prolabentem ex arteriis sanguinem chylo turgidum, dum per porosam partium substantiam ulterius circulatur, aliorsum abripiat, aut ita immutet, ut quando à sitientium venarum extremitatibus iterum reassumendus venit, talis amplius non sit? Sed aqua è pumice postulatur. Si ergò chylus sanguini permixtus, etiam in venis adhuc oberret, phlegmones quoque per harum obstructions, æquè facilè, si non facilius, ex sententia *Dn. Blancardi* fieri posse, jam auguramur.

XXV. Quam porrò meris & solis rationum figmentis, posthabita omni experientiæ parte, suam nitatur stabilire doctrinam *Dn. Blancard*, sequentia cuilibet planum facient. Quando enim tumorum inflammationibus sæpè conjunctorum perquirat originem l. c. sic refert. Cum itaque, inquit, obstructionum sedem in extremis esse arteriarum ramulis, firmiter demonstraverimus, tumorum nunc quoque procreatio facile cognosci poterit. Dum enim pro certo habemus, quemadmodum etiam demonstratum fuit, liquorem lacteum seu chylum in arteriarum extremitatibus immotum hære, affluxumque nihilominus continuari; consecrarium quoque esse videtur, obstructas ad hunc modum arterias per continuò appellentium humorum influxum valdè extendi, dumque



dumque hoc in una vel altera sic accidit & vicinæ etiam comprimuntur, dicti humores moveri desinunt, quorum stagnatione plura dilatantur vasa, quæ sic constituta, tumorem, renitentiam, nitorem atque duritiem tanquam phlegmonum satellites, post se trahere solent. Verùm quam nimis à verò aliena hæc sit sententia, duobus saltem declarabimus argumentis. Primum est, quo etiam supra laudatus *Dn. Diemerbræck* adversus eos qui sanguinis motum circularem per anastomoses vasorum fieri, & inflammatorium tumorem ex solis distentis vasis originem habere voluerunt, disputans, usum fuisse meminimus: *quasi verò, inquit, vasa ita distendi queant, ut inducere possint duorum triumve digitorum altitudinis tumores, quales sæpè conspiciuntur*: Imprimis si paulò diligentius nobiscum perpendimus, vasa in quibus ejusmodi obstructions finguntur omnium esse minutissima, quæ ergò tanto minus eousque extensionem sustinere poterunt. Alterum quod objicimus quodque olim nobis objecit jam supra, nondum tamen supra modum laudatus *Vir. Magnificus atq; Experientiæ. Dn. D. Mappus*, occasione Dissertationis Academicæ sub Ejusdem Præsidio habitæ, quod præsentī nostro argumento accommodatum ita sonat: Cur scilicet si *Dn. Blancardi* sententia firmo niteretur fundamento, in amputatis membris, ubi per arctas primum ligaturas vasorum latera constringuntur, vel etiam eorundem orificia variis remediis adstringentibus obturantur & occluduntur, non etiam maximæ succrescerent inflammationes & quidem tales quæ nullo cederent remedio, sed exitio potius universi corporis terminaturæ.

XXVI. Sed in fervore omni opinione celerius nimium excrevit noster discursus, colligamus propterea animi mentem ab inflammationis hujus æstu, & ad causas reliquas *Gangrenæ & Sphaceli* enucleandas revertamur. Sanguis ergò si vel ratione quantitatis excedentis vel deficientis, vel qualitate etiam peccat, causæ mediatae proximioris locum tenere solet. Excedente quantitate, ut jam abundè dictum, *Gangrenæ & Sphacelo* occasionem præbet, dum major hujus copia, quam partis natura efflagitare videtur, in eam influit, ibidem verò stagnans cessante ventilatione & motu varias subit corruptiones, variaque producit mala alia. Id quod expressè docet *Galenus* in quodam loco, quando inquit, *sit ut plurimum Sphacelus, à sanguine copiosissimo in parte aliqua collecto, sive propter dolo-* rem fuerit attractus, sive sanguis ille propter partis imbecillitatem fuerit susceptus, qui deinde cum evacuari aut dissilari non possit, corrumpitur. Distinctius magis nobis hæc iterum proponit, *Vir fenili gravitate Celèberrimus, Melchior Sebizius. l.c.* ubi duplicem profert causam quare & quomodo ad magnas inflammationes sequatur *Gangrenæ*. Primò nimirum hoc fieri, ait, quia calor



inflammatae partis natus suffocatur: idque propterea, quoniam per maximas phlegmones ob insignem influentium humorum copiam, orificia vasorum cum spiraculis cutis vehementer sunt obstructa, unde perspiratio cesset, calor suffocetur, mortificatio denique partis necessario consequatur: Hanc suam sententiam per locum aliquem *Galenus l. de tumor. c. 8.* confirmat. Alteram vero causam esse putat, quoniam arteriae partis phlegmone obsessae ab humorum copia vel obstructae, vel constriktae, atque compressae efficiunt, quo minus vitalis calor atque spiritus influere possit, quo influxu destituta, *Gangrenam* primò, deindè, nisi celeriter succurratur *Sphacelum* etiam supervenire, ait. Pars autem hoc modo affecta, per modum *πνιγος* suffocationis, ex abundantia humorum extincta ei cum *Galeno l.c.* dicitur.

XXVII. Sed severus ad hæc inscenam iterum prodit *Dn. Bontekoe, l.c. art. vj.* risum tamen potius quam dubium lectoribus excitans, quemadmodum ex sequentibus apparebit. Sic autem ille, Doctores nostri per *Gangrenam* à calore exortam, eam plerumque intelligunt, quæ inflammationes excipit. Sed quærit, quisnam eos docuerit, quod inflammatorius calor *Gangrenam* excitet? Ex eo ne hoc elici debet, inquit, quod *Gangrenam* præcedat calor p.n.? si hoc est, verum quoque & illud erit, quod eadem *Gangrena* ex pulsu inflammationi conjuncto, qui æquè ac illa, hanc præcessit, originem trahat. Verùm seriùs eum venire putamus, quando docere conatur, quod non omne id quod præcedit, causa alicujus rei existat; sic enim loquitur. Veteres enim Medici optimi plerumque Philosophi probè hoc perspectum habebant. Ridiculum certè est simile, quo prædicti sui canonis veritatem stabilire audet, cujus etiam proindè, dignitati & existimationi hujus Viri parcens, nullam hic injiciamus mentionem. Porro pergit ille, si inflammatio in *Gangrenam* mutatur, qui poterit ergò causam constituere extinctionis, quæ frigore absolvitur; vult sibi *Auctor* hoc, difficile scil. esse, ratione assequi, qua de causa inflammatio tanquam causa efficiens, edat effectum qualitatis contrariæ, h.e. frigoris. Sic etiam, ait, si dicatur quod calor calore consumatur, item quod magna humorum copia, nimiusque eorundem motus calorem nativum suffocet, vel in causa sit quod eo citius dissipetur, ceu videre est in lampade minore ellychniis multis instructa, cujus oleum brevi tempore consumitur; equidem simile hoc non admodum ineptum esse judicat, quod tamen nequaquam propositæ rei difficultatem semoveat. Ultimo tandem loco addit, *Gangrene* generationis modum ex inflammatione obscurum manere, de quo nihil aliud sciamus, quam quod calor unus sit alterius interitus, quod attamen à verò multum distat.

Nam



Nam si verum quod calor calorem interimat, quærit, cur ignis quoque igne non extingui possit? Vel, quare universum febre ardente exæstuans corpus, *Gangranâ* non corripiatur. Verum quum neminem futurum esse existimemus, qui non aut ludentem aut simulantem censebit *Dn. Bontekœ*, operam ludi arbitramur, in excutiendis iis quæ protulit, diutius inhærere. Persuasum interim nobis manet, ex Veterum etiam sententia satis clarum esse, qua ratione ex sanguinis abundantia & inflammatione ortum suum trahat *Gangrena*.

XXIIX. Hactenus ergò de *Gangrena* ex sanguinis copia redundante. Nunc ad eam quæ ex ejusdem defectu ortum trahit, progrediamur. Diximus autem suprâ, repetimusque hoc loco ex *Sylvij Prax. Med. l.1. c.37.* generalem sanguinis ad partes omnes ac singulas delati usum esse ipsarum nutritionem. Quamprimum enim tanta sanguinis copia in partes non influit, quanta ad sufficientem nutritionem his opus est, tunc è vestigio marcescere incipiunt, qui marcor tandem levi de causa in *Gangranam* aut *Sphacelum* abire solet. Propria enim partis temperies cum ab influente non amplius actuetur, interit, adeoque partis compages dissolvitur, ita ut præ putrilagine quasi diffluat. Vid. *Sennert. l.5. p.2. c.19. Peccett. l.1. c.3. Portzius. de Tumor. c.7. Fabr. Hildan. l.1. c. vj. Eustach. Rud. l.2. de ulcer.* qui ultimus per experientiam sibi notum esse testatur, in tabidis, & marcore correptis, nec non in plerisque valdè diuturnis febribus, interdum propter innati caloris dissolutionem, & alimenti defectum exteriores partes & artus extremos, ut pedum digitos integros emori, & penitus corrumpi. Consentit quoque *Melchior Sebizi* *l.c.* qui hanc extinctionis speciem *μᾶλ' ὀφρῶν* appellat. His & qui similem fovent opinionem contrariatur iterum *Dn. Bontekœ* & ex parte commentat. ejus *Dn. Albrecht*. Ille, quando primò ex eo quod Auctores Veteres non exactè quemadmodum Philosophos deceret, quonam præcisè modo atrophia in *Gangranam* aut *Sphacelum* terminetur, exposuerint, ipsam rei possibilitatem omninò pernegat. Sed nos jam non attinet, gravem hanc imò injustam Auctoris in Venerandam Antiquitatem semovere censuram, cum per se satis constet, quam non ineptè Veteres præsens hoc argumentum ex suis demonstrarint principiis. Illud saltem hoc loco mirari fas est, quod Auctor, qui tamen alias pro emunctæ naris Philosopho haberi cupit, vel non vereatur, vel nesciat artificioso magis modo formare consequentiam. Qualis enim quæso est, quando hunc ad modum argumentatur? *Gangrena* non est ab atrophia, si quæras rationem, respondet, quia Veteres mutationis hujus naturam & modum non distinctè exposuerunt. Vel etiam, quod est alterum ejus argumentum, quia non omnium



tabidorum corpora hoc modo afficiuntur, vel quia non totum atrophiam laborantium corpus gangrenatur. Priorem enim argumentandi formam, per instantiæ saltem modum, si res ipsa non loqueretur, annihilare possemus. Alterum verò quod spectat, nostra fert opinio, illud propterea non fieri, quod non omnium tabidorum corpora, nec singulorū singula membra ita comparata sint, ut affectus noster in ea transire queat. Cæterum, quam ex solo contradicendi studio hæc & similia ab *Auctore* nostro proferantur, vel ex eo unice apparet, quod ipse non inficias eat, ex nutrimenti defectu, partes sua nonnunquam privari vita, paulo verò post, contrariam huic iterum defendat sententiam.

XXIX. Potiores ergò partes in constituenda *Gangrena* competere sanguini vel redundantanti vel deficienti, nemo fortassis erit qui inficiabitur: Non tamen non nullas quoque esse, quæ ab ejusdem qualitate seu vitiata crasi dependent, itidem largimur. Veteres communiter occultam qualitatem seu materiam malignam accusarunt, quæ vel progenita esset in corpore, vel extrinsecus eidem accederet. Sic pro ingenua habet *Hildan. l.c.* cum grumus aliquis sanguinis extravasatus, aut alia quævis materia corruptione tantam venenositatem & malignitatem adsciscit, ut postea si naturæ vires tulerint, in extremitates excussa & translata, suffocet innatum calidum, brevique partes eas perdat atque corrumpat. Hanc suam sententiam confirmat ex *Elegantissimi Fernelij* peringenioso & doctissimo tractatu, de *Abdit. rer. caus.* 15. l. 2. c. 15. ubi se experientia didicisse testatur, sæpè pedem extremum repente fuisse sphacelatum, factaque uberiore hujus rei descriptione, sequentibus verbis exclamat! Tot tamq̃ presentium malorum, quis intemperiem aut simplicem aut cum humore, causam esse statuatur? quis non potius venenatam qualitatem in partes omnes propagari putet, quæ extremam hanc perniciem inferat. Prolixus quoque admodum est in defendenda hac sententia ex *Italis* supra allegatus *Montagnana. l.c. c. 7.* ubi operosè ostendit, affectiones has esse ab exquisita putri materia & c. 9. quod materiæ *Gangrenæ* sit venenosa, sed non in summo. Argumentum autem ferè omnes desumunt ab eo, quod in morbis pestilentialibus magis & minus malignis *Gangrena* sæpius observetur. In hunc censum referunt etiam illam quæ ex morsuum & ictuum bestiarum venenatarum, aliarumque rerum vel assumptarum, vel extrinsecus applicatarum, venenosa pullulant qualitate.

XXX. Equidem non negaverimus, omnem prorsus hic abesse malignitatem, adeoque occultum quid, an tamen semper quæ hoc nomine ab *Auctoribus* notantur causæ, revera tales sint h. e. quæ modo quodam occulto, & mentibus nostris imperscrutabili, corrumpant partium substantiam,



stantiam, quemadmodum *Hildanus* & alii volunt, in dubium nobis vocatur. Ut jam saltem de iis quæ septica appellat Idem, instituamus sermonem, sola potissimum corrosivitate cum *Dn. Wedel. Amœnitatibus Mater. Med.* revera amœnis summoque jure ita dictis, *l. 2. S. 2. c. 1.* hæc contra *Hildanum* ejusdemque affectus, agere, nobis persuasum manet: Addito tamen hoc quod secundariò quoque fermentatio peregrina spirituumque quædam perturbatio consequi possit, ceu benè monet ibidem *Excellentissimus Wedelius*. Certè, sal quoddam, nunc volatile nunc fixum ejusmodi in casu, exactius rerum naturam pervestigantibus semper ferè se manifestare solet; id quod præter experientiam, medendi quoque methodus, qua uti solent, suadere videtur. Accedit & hoc quod superius indicati maligni moris morbi, nominetenùs Lues Venerea & Scorbutus, hoc idem confirmatum eant. Quousque enim in utroque polymorpho hoc affectu, peregrinum aliquod sal peccet & abundet, res ipsa loquitur. Undè etiam *Gangræna* scorbuticæ genealogiam intelligere, non amplius est difficile: mentionem hujus faciunt *Francisc. de le Boë Sylvius, Prax. med. appendic. tract. 3.* & *Dn. Gualter. Charleton, de Scorbuto libro singulari c. 2.* quibus in locis uterque circa exanthemata horum morborum vario sparsim stigmate cutim defœdantia, occupatus, monstrat quem in modum maculæ hæc primum rubicundæ & pulicum morsibus similes; aucto deinde malo, purpureæ, sublividæ, nigricantes, interdum mox ab eruptione disparentes, interdum ad plures annos, quin ad mortem usque infixæ; aliquando tam indomitæ malignitatis ut in squammas nunquam extirpandas, imò & *Gangrænam Sphacelumq;* abeant. Idem *Charleton l. c. art. 12.* testatur ulcera quandoque scorbutum comitari quæ haud rarò in *Gangrænam* desinant. Alienus etiam non videtur esse ab his *Benjam. Bræckhuysius, juratus Cartesianus, in Ration. Philosoph. Medic. Theoretic. Practic. c. 10.* quando se sæpius animadvertisse dicit, *Gangrænam* delitescentem in parte aliqua corporis præcipua à fermento quodam summè acido & corrosivo. Similem quoque observatam fuisse *Dn. Muralto, indefessi laboris Viro, à defluxione scil. acriore, ex Miscell. Curios. Ann. Tert. Observ. 143.* patet. Conferatur etiam *Joh. Muys. Prax. Chirurg. Rational. Observat. 3. & 4.* Sano ergò sensu admittimus recensitos hos modos occultos dici posse, quatenus sc. non prima statim fronte occurrunt in sensus: si tamen occultum sumatur pro eo cujus nulla prorsus ratio dari potest, omninò negamus.

XXXI. Tantum ergò de causis internis: Quænam verò præcipuæ sint inter externas, nunc in ordine quoque dispiciendum erit. Notamus autem primo loco eas, quas etiam *Hildano* observatas fuisse ex *l. c. c. 17.* constat; mediantibus Viz, quibus partes alimento suo & calore na-



turali defraudari solent. Tale quid verò frequentius accidere ait Idem, dum empirici, & cæteri improvidi chirurgi, arctius luxatos artus ossaque fracta constringunt: Unde duplex vult resultare damnum. *Primò*, quod hoc modo majori copia quam par est, humorum fiat affluxus. *Secundò*, constringi vasa, hincque fieri, quod nihil sanguinis in partem affectam vel influere, neque ille qui jam in parte illa præsens adest, effluere possit. Necessum ergò esse, ut sanguis, qui sic remanere cogitur, cum non ut antea ventiletur, vario corrumpatur atque alteretur modo, qui tandem ipsam partis substantiam similiter quoque afficiat. Hinc factum esse ait, quod *Hippocr. l. de Fractur. Galen. m. m. l. 6. Paul. Æginet. l. 6. c. 100.* alique Veterum scriptis suis sanciverint, in similibus curationibus tam arctis vinculis fasciisve partem affectam nequaquam esse constringendam, nec ferulas ante septimum aut undecimum diem, quo tempore humorum affluxus, dolor, inflammatio & ejusmodi symptomata alia sint vehementiora, applicandas esse. Simile quid ex luxatis sed perperam repositis ossibus accidere posse idem testatur *Hildanus*. Scilicet quod crassum ossis capitulum vasa vicina comprimat, ut sanguini, sæpè etiam spiritibus liberè progredi haud liceat. Quando verò multo facilius partem *Gangrena* & *Sphacelo* vult corripì, ex transversim dissecta vena aut arteria, deindè ex immoderato quoque adstringentium usu, quæ Practicis defensiva dicuntur, idem fieri posse, haud ita facilè nostrum præbemus assensum. Ex Sclopetorum vulneribus sæpius quoque *Gangrena* succrescit, quod etiam *Fallopio* observatum legimus, *l. de Tumor. p. n. c. 26.* cujus rei rationem dilucidè admodum nobis exhibet *Vir Xαειρεγός & Experientissimus Dn. Henricus Nicolai, Medicus Celeberrimus, in dissertat. Inaugur. de Vulner. Sclopet. c. 6. §. 18.* ubi graviorum symptomatum, vulnera hæc concomitantium, non ex glandium pyriive pulveris venenositate, sed illarum furente impetu deducit, quo partibus, in quas impingunt, penetratis, quicquid obviam est, carnes, venas, nervos & ossa collidunt, contundunt & dilacerant. Unde sanguine postmodum effluente, calore in auras diffuso, spiritus evanescunt & dissipantur, cordisque per sanguinem, spiritum & calorem vitalem, influxus prohibetur. Quo facto, putredine oborta fœtor sequitur, labia vulneris nigricant, aut livent, ulceribus succrescentibus, tandem *Gangrenam*, *Sphacelum* & mortem ipsam his omnibus succedere, addit. Similem ferè cum hac rationem esse majorum bestiarum morsus, utpote equi, lupi, leonis, ursæ, canis, ubi tamen non tantum maxillarum, dentiumque attritui fortiori, quam salivæ etiam certo modo in quibusdam characterisatæ, talia phænomena adscribenda esse existimamus. Contusiones graviores, ut & enormes  
ustiones



uisiones idem præstare solent. Has & causas similes pro veris nequam iterum vult agnoscere *Dn. Bontekœ*, alias propterea detegendas esse ait, quas etiam altero chirurgiæ suæ volumine erudito orbi promittit.

XXXII. Restat adhuc ut de *Gangrana* frigoris injuria contracta verba quoque faciamus. Volupè quidem nobis erat, argumentum hoc ex sanioris Philosophiæ principiis, ob dignitatem suam, prolixius deducere, deterruit tamen nos à proposito, tam quod videremus discursum hunc nostrum justas jam excessisse limites, quam quod nimium etiam à proposito nostro dilaberemur scopo. Sufficiat ergò pro tempore ex suprà jam dictis hoc loco repetere, *Primò*, vitam nostram in salvo existente humorum motu mechanico perrennare, quo interrupto aut in toto aut in parte aliqua, illam quoque nunc magis nunc minus talem existere. *Secundò*, totum illud corporis nostri reticulare integumentum, cutis, innumeris perforatum & pervium esse poris, (non tamen illos tantum hic intelligi volo, quos Recentiorum quidam tanquam organa Sudoris excretoria fortassis sibi certius fingunt quam demonstrant) patulum adeoque esse pro ingressu & egressu minimorum. *Tertiò*, frigoris criterium potissimum esse condensare & coadunare magis tam solidorum quam liquidorum particulas. *Quartò*, sanguinem maximè esse coagulabilem. *Quintò*, extremas & prominulas corporis nostri partes, respectivè minus esse calidas, minus propterea externis his injuriis resistere. Quibus suppositis, latere amplius nequit modus seu ratio *Gangrana* ex frigore. Huic non multum absimilis est illa species, quæ ex prohibita transpiratione ortum ducit, cui præter jam dictum frigus emplastica sæpius occasionem præbere solent. Acriter tamen contra hanc ipsam iterum insurgit *Dn. Bontekœ*, eò quod impossibile esse arbitretur, transpirationem humano in corpore cessare posse: Quum tamen ejusdem *commentator Dn. Albrecht*, tam ex ratione quam ab exemplis veritatem hujus rei jam solidè satis demonstrarit, actum agere nolumus. *Gangranam* hætenus ita consideratam *Galenus* in duas dividit classes: *Primò*, in eam quæ est cum humorum affluxu: & *Secundò*, in eam quæ sine affluxu. Ad hanc refert eas quas jam modò proposuimus, ut & quæ ortum ducit ex atrophia. Ad illam verò, quæ hydropicis, ulceribus rheumaticis, tumoribus phlegmonosis, iëtibz venenatis supervenire solent, vid. apud *eund. l.2. ad Glauc. c.1. & l.3. m.m. c.8.* Utcunque verò generalior paulò alicui videbitur causarum hucusque recensitarum tractatio, talem attamen esse putamus, ad quam reliquæ etiam, saltem quæ frequentius in conspectum Chirurgi veniunt, quasque passim apud *Observation. Scriptor*, observare est, referri queant.



XXXIII. Sic ergò ad finem perducta æthiologia, nunc in ordine quoq; differentiarum suscipioremus examen, nisi jam ex parte constaret quem in modum à se invicem distinguantur *Gangrena* & *Sphacelus*: Quæ verò adhuc restant, unâ cum signorum doctrina, quam jam aggredimur, erunt complectenda, sicq; una fidelia duos dealbabimus parietes. Quemadmodum autem hæc, reliquas Medicinæ Practicæ partes utilitate sua antecellit, ita apprimè judicamus necessarium, ut hanc ipsam præ aliis omnibus Chirurgus sibi quam maximè habeat commendatam, præsertim verò similibus in affectibus, turpiter enim alias se geret, dum facili modo *Sphacelum* pro *Gangrena* sibi curandum sumet. *Gangrena* itaque secundum superius dicta, cum vel sit incipiens, vel medii status, vel denique absoluta atque perfecta, & qualibet harum aliam præ se ferat faciem, hoc in loco verè ita dictam, ceu reliquarum normam per sua signa declarandam nobis sumamus, ex quibus postmodum reliquas cognoscere haud erit difficile. In hac ergò *Primò*, coloris flos perit & extinguitur, cujus in locum succedit lividus & fuscus, carnes etiam redduntur flaccidæ, mollescent, quia affluxus sanguinis laudabilis cessat, & ejus qui jam affecta in parte stagnat, varia fit corruptio. *Secundò*, magis magisque imminuitur sensus, consequenter etiam dolor, calor etiam natus spirituumque vitalium distributio deserunt partem, quæ propterea ad omnia quasi surdet. *Tertiò*, recedit quoque pulsus, aut exiguus saltem percipitur, scil. ex eodem sanguinis vitalis denegato in partes affluxu. Signa verò hæc præter ipsam partis corruptionem quæ *Peccettius l.c. ex Galen. l. de Tumor. c.8.* collegit, cum eodem meritò universaliter dicimus, eò quod omnibus ferè speciebus à quacunque causa ortum traxerint, convenient. His verò accensentur adhuc alia specialiora, prout scil. modò hanc modò aliam agnoscit causam: Sic *Paræus l.c. c.13.* *Gangrena* frigore contractæ signa censet, si *derepentè acutus dolor pungens, & urens partem invadat: penetrabile namq; frigus, inquit, adurit: Si micans robur tanquam à nive manibus tractata, mox in lividum colorem abeat: Si pro accidentario qui inerat calore, mox frigus & stupor cum horrore partem occupet, quasi quartanario insultu quateretur,* (qua similitudine omnes propemodum quos evolvere licuit *Auctores*, utuntur. Si à sanguinis & spirituum defectu *Gangrena* immineat, exiguus aderit dolor, nullus calor, nec tumor, maculæ verò in parte affecta conspicientur mox nigrescentes, cutim corrugantes & quasi exsiccantes, ita quidem ut scarificatæ, nihil humiditatis profundant. Species hæc plerumque corporibus macilentis, infirmis & extenuatis, sive senio, sive graviore aliquo morbo, quorum vires elanguidæ, accidere solet; maximè verò extremæ horum partes hanc experiuntur noxam, ceu pluribus

videre



videre est apud *Hildan. l.c.* ubi aliquot historias integri cruris *Sphacelati* ex prænominata causa, profert. Si à veneno extrinsecus applicato, pars affecta insigni dolore cruciabitur cum superveniente inflammatione, & nisi remediis in *Gangrena* usitatis addideris alexipharmaca, iis nihil proficies; quod si verò ab intus sumpto fuerit genita, dolor capitis intollerabilis, vertigo, lypothymia, alvi fluxus, similiaque prava malignam labilem indicantia symptomata aderunt. *Gangrena* scorbutica ut plurimum per maculas fuscas se prodit, in escharam siccam cum membri torpore degenerantes. Vulneribus verò *Gangrenam* supervenire, dignoscitur ex labiis vulneris flavescentibus, carne interiore marcescente, & contactum instrumentorum sine doloris perceptione, ferente. Quam inflammatio produxerit, signa erunt, doloris & pulsationis sine causa manifesta resolutio, suppurationisque diminutio, coloris in parte flammei & rubentis subitò infusum aut lividum mutatio, ceu *Paræus* ex *Hippocrate* docet. Reliquarum verò specierum recensendis signis, utpote non ita frequenter in Praxi occurrentium, quodque partim ex jam dictis facile cognosci possint, hoc loco superfedemus.

XXXIV. Quamquam autem his ita perspectis, *Sphacelus* ipse aliquo modo se conspiciendum præbeat, hujus attamen signa eodem ex fonte hauriamus ne sc. festinata nimium manu atque citius fortè quam par est, ad ferrum aut ignem tanquam unicum *Sphacelati* membri remedium, promoveamus gradum. Quoniam autem toties jam dictum fuit, *Sphacelum* nihil aliud esse quam ipsissimam partis alicujus mortificationem, facile patet, carentiam sensus inter reliqua signa haud postremum obtinere locum: Sensus enim viventium est, non mortuorum. Et eousque quidem amittitur sensus, ut facile sit, quemadmodum *Hildanus* loquitur, secare, ligare, urere & quamlibet operationem moliri, citra ullam sensationem. Emortua etiam hoc modo pars omnem suum nitorem aut gratum antea aspectui ruborem exuit, è contrario verò atro noctis colore notata, luminibus nostris displicet. Quumque naturalis illa & singularem in modum modificata partis temperatura & humorum crasis, quæ unice hætenus integritatem ejusdem reddiderunt salvam, sit deperdita, ipsa hæc pars totâ suâ substantiâ corrumpitur, & nihil nisi cadaverosum redolet, ita ut non ægrotis tantum, sed & è longinquo adstantibus intolerabili suo fœtore nauseam excitet. Propter eandem temperaturæ destructionem, omnis firmitudo & vigor, qui in partibus dum adhuc erant sanæ, observabatur, in mollietatem & flacciditatem quandam commutatur. *Hildanus* equidem vult, partem, quæ antea dum viguerat *Gangrena*, mollis erat, per *Sphacelum* exsiccari; quod tamen non nisi sub certo quodam admitti-



mus sensu. Ponderosum quoque magis redditur membrum *Sphacelatum*, quam dum naturaliter adhuc erat constitutum, de quo etiam ægri maximè conqueruntur, cum illud vix aut parum movere queant. Similiter enim se res habet ac in iis, quibus membrum quoddam ob nimiam nervorum ut & reliquorum vasorum compressionem, sanguinis & spirituum influxu destituitur, quo tempore magnam partis ejusmodi experiuntur ponderis incrementum. Cutis denique à subiecta carne levi negotio separatur.

XXXV. Commemoratis ad hunc modum signis, de distinctivis quoque, quibus scil. ab aliis quibusdam affectibus consimilibus discernitur *Gangrena* & *Sphacelus*, quædam adhuc addere jam suprà promissimus. Differunt ergò *Primò*, à Paralyfi, in qua equidem membrum afflictum emortuo simile videtur, cum nec moveatur, nec sæpè etiam sentiat, quod quidam superstes maneat coloris flos, salvo scil. adhuc existente sanguinis motu, specialius affluxu & refluxu. *Secundò*, quæ superest in membro paralytico calor vis, in *Gangrenatis* aut *Sphacelatis* omnis tandem evanescit: Illud quoque cætera salvum, ad longum usque temporis spatium ita subsistit, cum è contrario hæc, semel oborta putredine, mirum quam celerrimo fatis cessent gradu. Per eandem hanc corruptionem à lepra *Gangrenam* distingui posse, censet *Helmont tr. de lithias.* eò quod in illa fecus quam in hac non sit totalis. Ab ulcere etiam ambulativo, *Phagedæna* aliàs, vernaculâ nostrâ, *der Wosff* dicto, eo ipso dignoscitur, quod hoc semper sit ulcus, huc & illuc serpendo cutim subiectamve carnem, tantum tamen extimam depascatur atque corrodat, rarò penitiora petat, observante *Peccettio ex Galen. l.2. Meth. Med. c.2.* *Gangrena* verò sine continui solutione ad ossa usque progrediatur: Hanc tamen quandoque etiam adesse ex superius allatis constat. A cancro, præterquam quod hic semper cum tumore conjunctus sit, differt quoque dolore punctorio & calore, quibus duobus symptomatibus molestissimum ad mortem ferè usque solet esse malum. Carbunculus etiam commune quid cum *Gangrena* habere videtur, ceu ex *Chalmeteo* in *Fernelium* constat, quando *l.7.c.7.* inquit, eandem propemodum *Gangrenæ* curandæ rationem esse atque carbunculi, quod utriusque ferè communia sint symptomata. Verùm quando carbunculus sive pestilens sive benignus cum ulcere semper crustoso ægrum invadit, ut *Galen. libr. de morbor. different.* habet, hunc ab illa satis distingui posse censemus.

XXXVI. Utut verò gravissima sint mala, *Gangrena* atque *Sphacelus*, miseros tamen ægrotantes neutiquam propterea deferendos esse, Christiana jubemur charitate; alias enim jam afflicto afflictio adderetur major. Interim Chirurgus quoque non prius suscipiat curationem, ante-



antequam quid sperandum superfit, si vel curationi se subjiciat, vel eandem recuset æger, tum ipsi, tum adstantibus prædixerit. Duplex namque hac ratione in eum redundabit commodum, quemadmodum benè *Hildan. ex Galen. l. de Constitut. art. & Hippocrat. l. 1. Prænot. monet.* Instituto enim ex arte prognostico, Chirurgus *Primò*, à mortis crimine vindicatur; siquidem tanta sit indocti vulgi impudentia, ut si quando res pro voto non succedat, & mala malis (phrasi *Hippocratea*) superveniant, omnem mortis culpam imputare Chirurgo non erubescat. *Secundò*, cum ægrotans viderit, Chirurgum naturam, magnitudinemque morbi penitus agnoscere, morigerum ei se magis præstabit: Cujus obtemperationis quanta sit in foro chirurgico utilitas, tam ex parte ægri, quam ex parte Chirurgi, indies experientia edocet. *Tria* autem prognosticaturò Chirurgo considerata esse, ait *Hildanus.* *Primò*, essentiam atque naturam morbi. *Secundò*, virium robur. *Tertiò*, ipsam partem affectam: quibus addere debuiſſet, *Quarto loco*, causarum naturam. In compendio autem hæc omnia ferè nobis exhibet, Medicorum *Cicero, Cornel. Celsus, l. 5. c. 26.* quando inquit, *Gangrænam, si nondum planè tenet, sed adhuc incipit, curare non difficillimum est, utiq; in corpore juvenili: & magis etiam si muscoli integri sunt, si nervi vel laesi non sunt, vel leviter affecti sunt; neq; ullus magnus articulus nudatus est; aut carnis in eo loco paululum est, ideoq; non multum quod putresceret, fuit; consistitq; uno loco vitium; quod maxime fieri in digito potest.* *Galenus* quoque *l. de Tumor. p. n. & cum eo Paul. Ægineta. l. 4. c. 19.* hujus affectionis tantam vim esse perhibent, ut nisi quis rupta omni mora, præsentissimas tulerit suppetias, pars affecta promptissime habitum mortis contrahat, hominemque interimat, ceu jam superius etiam dictum fuit. *Gangræna* quò remotioribus magis insidet partibus, tantò magis habet periculi, omnemque sæpè respuit curam. Periculosius nihilominus partes internæ præ externis gangrænantur. Hinc absolute lethalem pronunciat *Gangrænam* intestinorum *Petrus Forestus. l. Observ. Chirurg. 1. obs. XIII.* Omnium etiam penè *Auctorum* stat sententiâ, humidarum magis partium ut sunt gingivæ, palatum, nares, pudenda, intestina, rarò sanabiles esse *Gangrænas*; cujus rei rationem *Hildanus* reddidit, quòd sc. partes illæ sint calidæ & humidæ, partim raræ & spongiosæ, plurimis proinde humoribus & excrementis suscipiendis opportunæ. *Gangræna* aut *Sphacelus* quando in inguina, aut thoracem aut partem aliam præcipuam grassatur, à sectione abstinendum esse monet *Peccettius.* *Eustachius Rudius* tamen, tunc demum intactos relinquendos esse vult ægros, quando magna partis portio abscindenda se offert. *Hippocrates, l. 7. aphor. 50.* inquit. *Quibus cerebrum Sphacelletum est, intra triduum perire: si verò hos supera-*



*vint, sanari.* Non autem verisimilè videtur, ait *Hildanus*, *Hippocratem* hoc in loco propria in significatione accepisse vocabulum *Sphaceli*, sed pro *Gangrena* potius verè dicta, quæ illius est velut anteambulo. Magis tamen nobis arridet *Galen*i opinio, quando *Hippocratem*. l.c. *Gangrenam* simpliciter aut ingentem aliquam inflammationem subintellexisse existimat. *Hydropicorum* tibiae *Gangrena* quandoque infestat, quam rarò sanabilem esse, sed sæpius in *Sphacelum* degenerare dicit *Hildanus*, ob rationem quam ex *aph*.8. *Sect*.17. petiit, quod aqua intercutem laborantibus supervenientia ulcera difficile sanentur. Ad hoc fortassis respiciens *Dn. Peccettius*, asserit, *Gangrenam* ex humorum affluxu difficilioris esse sanationis quam illa quæ est sine affluxu, & celerrimè interimere, nisi adsit valida virtus resistens, id quod etiam testatur *Hildanus*, cui quoque *Sphacelus* à pede aut tibia ortum ducens, & genu ipsum transcendens, lethalis ut plurimum habetur; quod in illa femoris carnosâ parte, tanquam calida & humida, putredo facilius serpat, & in musculosam illam substantiam ita se insinuet, ut vix penitus tolli queat, quantumvis instituat amputatio. Porro, in *Gangrena* ex prohibito spirituum influxu, potissimum si tale quid ex membris luxatis & male restitutis proficiscatur, vix aliquam curationis spem remanere. *Gangrenati* ex qualitate humorum venenata, nisi ocyus ferantur suppetiæ, ut plurimum naturæ satisfacere solent. Citius etiam per *Gangrenas* corrumpuntur membra tempore æstivo quam hyemali. Ex parte Chirurgi, secundum *Montagnam* l.c. c.14. malum vel bonum quoq; præfagire possumus, quando cum *Arethæo* inquit, neq; Medicum pigrum ignavumq; esse oportet, in offerendis scilicet oportune maximis remediis, vel misericordia morum in explicandis in dilatandis, in incidendis & urendis morbosis membris, ne videatur immanis, ex misericordia tali in carnificinam devenit. Nam, pergit, ad malum insanabile hæc conducunt: malunt enim agros potius morte conficere, quam misericordis nomen amittere.

XXXVII. Sed provehendo ulterius, in spatiosum tandem curationis seu Method. Medendi campum descendimus, cujus numerosos admodum flores in unum fasciculum per modum epitomes colligemus. Vix enim pretium operæ nos facturos arbitramur, quæ ab aliis jam in totum quasi exhausta, uberrimèque declarata fuere, cum temporis dispendio, tædiosè hoc in loco repetere. Totum autem curationis negotium, quod Chirurgus non facilè sine cooperante Medico suscipere debet, duabus potissimum absolvitur partibus. *Primò* enim è allaborandum est, ne *Gangrena* qualiscunque tandem sit, ulterius eundo altiores agat radices. *Secundò*, ut jam præsens, debito auferatur modo. Universalia equidem secundum artis præscripta particularibus semper præ-

mit-



mittenda essent: Verùm quum malum hoc ne quidem breviorẽ sæpe patiatur moram, neglectis istis, ad ipsam statim hujus curationem ut se convertat Chirurgus necessum quandoque habet. Per universalia autem hoc loco intelligimus evacuationes per medicamenta purgantia, venæ sectiones, cucurbitulas, frictiones, ipsam denique etiam diætã. Duabus prioribus, V. S. nimirum & purgatione, omninò abstinendum esse monet *Joh. Vigierius l. i. c. ii.* quod Viz. motis sic humoribus, venenum extrinsecus ad interiora trahatur, & quod materia putrida commota reddatur pejor quàm dum erat quiescens. Monitum tamen hoc non ita simpliciter sed limitatè cum *Hildano* accipiendum esse putamus, qui venæ sectionem in certis quibusdam *Gangrænæ* speciebus admittit. Quandoq; verò vel ægrotantis naturâ vel morbi circumstantiâ tale quid suaderi videbitur, ne id cum scrupuloso syderum delectu fiat, cum eodem *Hildano* monemus. Dum enim benignum syderum expectamus vultum, occasionem quæ *Hippocrati* præceptum audit, sæpè amittimus. Quod ipsum etiam ex variorum doctissimorum *Auctorum* monumentis, urgente necessitate testatum reddere possemus. Labet interim unicum saltem hoc loco *Expertissimi* nostri jam sæpius citati *Hildani* proferre testimonium, quando *l. c. c. vj.* inquit: *Sincerè dico, ne minimam quidem alterationem post venæ sectionem, aliasq; operationes contra regulas astrologicas factas, unquam secutam in tota mea praxi me observare potuisse. Videant igitur Tyrones ne ab instituto facillè deterreantur.* Suspiciamus tamen *Hildano* de iis saltem fuisse sermonem, in quibus haud procrastinari licet.

XXXIIX. Præmissâ hâc generali doctrinâ, specialem jam ab ipsis etiam Indicantibus auspicamur. Desumuntur autem hæc, partim ab affectus natura, causis efficientibus, partim etiam ipsius decumbentis viribus. Proque harum circumstantiarum varietate, ipsa quoq; remedia ex tribus præsidiorum fontibus alia atque alia esse solent. Subintellectis verò iis, de quibus Medicum sollicitum esse oportet, Chirurghi potissimum hoc in loco fungamur officio. Si itaque *Gangræna* ex intempestivo sanguinis affluxu seu inflammatione suum duxerit ortum, sanguis *Primò*, qui adhuc ad partem ruit, quovis modò arcendus est, idemque aliorum derivandus & ex parte evacuandus. Prioris scopi compotes nos reddunt adstringentium, propriè magis defensorum classis: Quorum multa passim apud *Auctores* prostant exempla. Sic *Hild. l. c. c. 13.* mentionem facit unguenti defensorii ex *Anton. Chalmet. l. i. c. 3.* tum cataplasmati minoris impensæ, ex farin. hord. bol. armen. alb. pulv. gallar. vir. nuc. cupress. cort. granat. caphur. cum oxymelite facillè parabilis. Cessante verò talium continuato usu, defluxione, nisi corruptionis ulterioris



principium se manifestaverit, à defensivis abstinendum erit. *Secundò*, purgationis, phlebotomiæ, cucurbitularum, hirudinum aliorumque similium ope, prout scil. ægrotantis, morbi que status modò hoc, modò aliud exigit, revulsio & derivatio influentium humorum in partem affectam, instituenda. Stagnantes denique & computrescentes humores ex ipsa parte affecta provocandi; quem in finem scarificationibus magis vel minus profundis, pro rei scil. præsentis statu, partium unitatem dissolvimus. Suadet etiam *Hildanus* majoris venæ si quæ adsit in parte affecta, sine mora incisionem, pro liberiore nimirum humorum exoneratione; id quod tamen non nisi sub certis quibusdam circumstantiis intelligendum esse ait, si scil. morbus gravissimus, æger juvenis, & vires adhuc fuerint firmæ: Nervos autem majores, tendines & arterias nefas esse attingere, nisi maxima aderit corruptio. Scarificationum vicem hirudines interdum explent, id quod etiam *Hildanus* exemplo quodam confirmat: In harum defectu, aut si æger eas respuat, (quas tamen semper proposito convenientiores existimat Idem) tres aut quatuor cucurbitulas minores applicare solet. His hucusque adhuc modum peractis, aceto denique cum sale aut lixivio fortiore, cui aloes & lupini fuerint incocti, pars affecta repetitis vicibus abluenda, quo putrefactionis viribus eò melius resistamus, calidumque innatum revocemus. Hunc in usum varia prostant apud *Auctores* decocta, quibus membrum affectum, quoties reiteratur medicamentorum applicatio, ablui debet. *Vid. Hild. l.c. Peccett. l.1. c.3. Sennert. l.5. p.2. c.19.* Unguento tandem etiam *Ægyptiaco Mesuai* vel *Hildani* languentem partem tuendam esse volumus, remedio certè ad auferendam putredinem & separandam carnem mortuam à sana, efficacissimo, præstantissimo, & observante *Hildano* inter reliqua *Gangrænæ* remedia, primario. Præter dictum unguentum mirificè quoque extollit cataplasma ex farin. lupin. lent. fabar. lolii, orob. sal. marin. summitat. absinth. scord. alliar. rut. cum oxymelit. paratum, quod egregiè resolvat, exsiccat, putrefactionemque inhibeat: In hujus tamen præparatione monitum Ejusdem nullatenus negligi debet, secus enim si fiet, in cassum laborabimus.

XXXIX. Quod si verò *Gangrænæ* his remediis nondum auscultet, ad valentiora tandem transeundum erit: Non tamen cum *Fallopio*, *Expertissimo* aliàs Chirurgo, arsenicum, aut mercur. sublimat. & his similia, utpotè valdè noxia & destructiva potius quàm conservativa, quæ caustica proindè etiam carnificum artes appellare non veretur *Paracelsus, tractat. de ulcer. cura*: Sed cum *Hildano* caustica potentialia, ex fortissimo lixivio, è cineribus sarmentorum & calce viva, non tamen nisi maxima efflagi-



tante necessitate in usum sunt revocanda. *Arabes* cauterium actuale frequentiore habebant in usu, quod ipsum etiam potentiali varias ob rationes præferebant, quemadmodum ex *Albucas. l. I. c. I.* & *Avicenn. l. I. fen. 4. c. 29.* patet. Unde non immeritò injustam censuram, imò & errorem nonneminis è Chirurgis, remedium hoc, inventum carnificum esse, latronibus magis quam ægrotantibus applicandum, asserentis, observat *Hildan. l. c.* Quamvis verò multiplex hujus observetur usus, ubique tamen locum vix invenit. De *Gangrena* frigore contracta, hoc præcipuè notandum est, quod si adhuc sit in principio, cujus indicium est, rubor partis, ejusdemque dolor vehemens & urens, hominem ægrum nequaquam derepentè igni esse admovendum, sed nive potius & glacie, aut aqua frigidissima, partem afflictam perfricandam esse. Hoc ipsum enim remedii genus, post maxima damna Regionum Septentrionalium incolas, usus, optimus rerum magister, edocuit: Quod postmodum quoque multi *Experientissimi Viri*, calculo suo confirmarunt: Ut adeoque de felici hujus experimenti successu dubitare haud liceat. Plura de hoc argumento qui desiderat, adire potest *Avicenn. l. I. fen. 3. c. 5.* *Levin. Lemn. de occult. natur. miracul. l. 4. c. 20.* *Sennert. l. 5. p. 2. c. 19.* *Hild. l. c.* Perfrictiones autem eòusque continuandas esse communiter perhibent, donec excitatis pustulis, punctorius sedatus fuerit dolor. Interea temporis sudoriferæ quoque potiones, ut calor à centro ad circumferentiam seu extremas feratur partes, subindè sunt propinandæ. Post hæc, affectum membrum decocto aliquo calido ex calidis confecto, fovendum, lacte scil. dulci, cui rosmar. lavendul. salvia, majoran. rut. puleg. bacc. laur. juniper. & similia fuerint incocta. Illinitio quoque oleor. de later. terebinth. cer. multum conducit; ut & emplastrum *Fallop.* ex rapo domest. & crassa radice raphan. q. f. pulv. sem. sinap. ꝑj. carioph. ꝑij. oleo sem. lin. ol. nuc. jugland. vetustiss. q. f. confectum, quod ipsum emplastrum ob insignem suam utilitatem & virtutis excellentiam, divinum appellitare non veretur. Theriaca cum vino pro usu interno subindè quoque assumi potest. Si verò *Gangrena* jam ulterius fuerit progressa, ad scarificationes, & ad reliqua jam suprà memorata remedia erit deveniendum. *Gangrena* à prohibito spiritus & alimenti influxu, pro diversitate causarum, diversimodè curatur. Sic si à stricta nimis ligatura, hæc laxanda: si à defensivis, hæc removenda. In luxatione si vasa nimium comprimantur, os primò reponendum, & succo deindè lumbricorum terrestrium cum oleo rosaceo pars inungenda, infràque luxationem scarificanda & fricanda. Tumores etiam scirrhusi vasorum latera comprimantes, emolliendi. Si fuerit ex discissis vasis majoribus, tunc in du-



bio versatur salus ægri. *Gangrena* si quæ imminet ex intemperie sicca, atrophica, quam insanabilem ut plurimum judicat *Hildanus*, præter diætā humectantem, extrinsecus ol. amygd. d. lil. alb. & similibus inunctiones admodum opitulantur. Dictus jam lumbricorum terrestr. succus, in hac egregiam quoque confert operam, ut & punctiones. Si verò jam præsens aderit, cucurbitulas non scarificatas, in progressu verò scarificatas applicare non in consultum erit, non neglectis tamen aliis de quibus jam antedictum fuit. *Gangrena* ex defluxu humorum frigidorum, quem morbum gravissimum & sæpius lethalem iterum censet *Hildanus*, defensivis aggredi debet, non tamen ut benè monet Idem, ex merè frigidis & siccis, quemadmodum in affectibus calidis, sed ex iis quæ mediocriter etiam calefaciunt, & propter vim suam adstrictoriam partes roborant, compositis. Magnarum quoque videtur esse virium cataplasma quod hunc in finem commendat, ut & decoctum quo scarificata pars fovenda & repetitis vicibus abluenda. Materia maligna si vel extrinsecè vel intrinsecè occasionem præbuerit *Gangrenæ*, in posteriore, exhibitis prius potionibus alexipharmacis, intermissa purgatione & venesectione, profundius pars affecta scarificari debet, quò eò melius materia maligna evocetur; adhibendæ quoque hirudines cum cucurbitulis: In priore verò actuale cauterium commendatur, quippè quo comburatur & absumatur id quod jam malignitatis est factum particeps; in hujus defectu, cultellis separatoriis aut novacula, quicquid infectum removendum, sanguinis verò profluentis impetus quoquo modo coercendus: Decocto tandem *Hildani* ulcus sæpius mundandum, Ejusdemque emplastr. *Ægyptiac.* correct. ut & cataplasma applicandum.

XL. Verùm, si nec hoc hætenus enarrato modo quidpiam proficiamus, totumque membrum immedicabilem subeat corruptionem, unicum quanquam miserum, nobis supermanet remedium, emortui Viz. membri per ferrum ablatio. Quippè juxta illud *Ovidij*, *Cuncta prius tentanda, sed immedicabile vulnus ense recidendum est, ne pars syncera trahatur.* Asperum certè & violentum, imò dubium quandoque præsidium, attamen cum inevitabilis necessitatis lex, ipsimet hoc insinuat Chirurgo, is propterea crudelis nequiquam dicendus erit. Crudele namque malum, ut cum *Vigierio* loquamur, crudeli remedio expugnandum: Nihilque interest an satis tutum sit præsidium, quod est unicum, satius enim est anceps experiri auxilium quam nullum, cum dubia spes, desperata salute sit melior. Consentit quoque *Hippocrat.* in Sect. I. aphor. 6. quando extremis morbis, extrema remedia tanquam optima opponit. Quanquam verò unica occurrat in curando *Sphacelo* indicatio, ejus nimirum



rum quod est corruptum & emortuum tanquam p.n. quid remotio, hæc attamen pro diversa tum ipsius *Sphaceli*, tum partis affectæ conditione, nonnihil variare solet. Si enim pars ægra talis sit, quæ sui extirpationem quoad totum *Primò*, non expostulat. *Secundò*, licet expostularet, hæc attamen propter aliquam ejus circumstantiam prorsus esset impossibilis, aliam tunc membrum afflictum subeat curam necessum est. Solicitum enim *Primò* Chirurgum esse oportet, ne malum hoc ulterius serpat, atque sic pars quæ adhuc est sincera porrò conservetur sana: Id quod defensivis unicè exequi licet. *Secundò*, illud quod jam corruptum removendum, quod tribus potissimum modis fieri solet. *Primus* est, quando factis inter partem sanam & ægram scarificationibus profundioribus, inspergunt pulver, ex arsenic. vel etiam quando imponunt unguent. *Ægyptiac.* arsenico corroboratum; quem tamen modum ob supra jam alleagtam causam, tanquam noxium è medio tollere jubet *Hildanus*, in cujus vicem ruptoria ex ciner. sarmentor. & calce viva, parata commendat, ceu quæ sine dolore brevi temporis spatio densam producant escharam. Jubet autem Idem ruptoria hæc applicare propè partem sanam, intermissa scarificatione, tanquam per se satis violenta, quæ altè penetrare possint. *Secundus* modus est, quando id quod corruptum, actuali cauterio aduritur. *Tertius*, quando partim id quod jam emortuum, novacula abscinditur ad sanam usque partem & deindè cauterio iterum actuali utitur Chirurgus, tum ad sistendum sanguinem, quam ad absumendas reliquias corruptas.

XLI. Secius verò longè se res habet, quando manus aut pes, aut quodcunque tandem membrum aliud integrum syderatum erit. Quo in casu non satis est, necessariam esse amputationem intelligere, quemadmodum *Industrius* loquitur *Paræus*; sed quo prætereà partis emortuæ loco illa administranda sit, nosse oportet. Acriter enim inter se disputant *Auctores*, an scil. sectio debeat institui in parte corrupta, an verò in sana? Prioris sententiæ Patroni, quum illud pro fundamento habeant, quod omnis curatio juxta *Galenum* debeat fieri tutò, citò, & jucundè, consultius multò in ægra jam parte sectionem celebrari perhibent, reliquum verò corruptæ substantiæ cauteriis ignitis extirpandum esse; multa enim gravia symptomata, doloremque ingentem hoc modo præcaveri existimant. Verùm quam periculi plena sit hæc sententia, minusque docta, *Hildan. l.c. c.17.* fufius exponit. Applausum ergò potius meretur altera opinio, quæ amputationem in parte sana instituendam esse docet, cui proindè nosmet etiam subscribimus, tanquam à ratione & experientia, testimonio quoque *Clarissimorum Virorum* comprobata. *Pec-*



*cettius* tamen media videtur incedere via, controversiam enim tot *Gravissimorum Auctorum* secum perpendens, ait, neque perpetuò esse secandum in parte sana, neque etiam semper inter corruptam & sanam. Tunc enim utilius juxta *Celsum* in sana parte institui sectionem, quando periculum imminet ne corruptio progrediatur longius, & putredinis confinia non benè cognoscuntur. Si verò certi simus corruptionem non ulterius procedere, tunc inter sanam & ægram partem transversim secandum esse. Tametsi verò judicium hoc *Peccettij*, satis videatur limatum atque cautum, nobis tamen neutiquam arridet, eò quod ex observatione *Hildani*, suspicio illa de progressu putredinis sæpius deprehendatur fallacissima; quando Viz. eadem profundiores sæpè numero intus agat radices, quam foris in summa cute appareat, id quod pluribus etiam observationibus testatum facit.

XLII. Hæc difficultate superatâ, ad aliam vix minoris momenti progredimur, quando scil. quæstio incidit, num membrum *Sphacelo* contaminatum, in ipso articulo quandoque sit amputandum, nec ne? *Dn. Peccettius* cum *Celso* negativæ favere videtur; fortassis ob rationes quas *Hildan. l.c.* profert: quod Viz. *Primò*, vulnera articulorum periculosa, imò lethalia nonnunquam esse soleant, propter gravissima quæ consequuntur symptomata, cum sint partes nervosæ exquisitissimo sensu præditæ. *Secundò*, quod ossa circa articulos lata ac magna, parum habeant carnis, quodque caloris circa hæc loca vis sit exigua, difficulter adeoque horum vulnera cicatrice coëant. Verùm licet *Hildanus* posthabitis à semetipso allegatis rationibus, cum *Guidon. tract. 6. doctrin. 1. c. 8. Laurent. Joubert. de vulner. Sclopet. p. 3.* aliisque sentiat, membrum in ipsa articulatione minori cum difficultate amputari posse, quod scilicet I. uno ictu, novacula benè cædente, id fieri possit. II. Quod sic non opus sit ferra aut alio instrumento. III. Quod dolor non adeò magnus. IV. Quod citra periculum fiat, cum nervi & tendines abscissi sursum contrahantur & carne operiantur. V. Quod, cum juncturæ hæc carne destituantur, venæ & arteriæ magis sint conspicuæ, sicque facilius effluentis sanguinis impetus cohibeatur. VI. Denique, cum articuli carnibus non planè destituantur, calorque eorum natus satis sit vegetus, pro cicatrice propterea inducenda, nullam remanere difficultatem. Licet inquam omnia hæc speciosius proponat *Hildanus*, nos tamen nequaquam consentientes haberet, (loquimur autem de juncturis notatu dignis) nisi ipsemet fateatur, quod sæpissimè hac in re felicem expertus fuerit successum. *Parvus* etiam eandem videtur tenere sententiam, quando monet, ne nova alicui videatur hæc sectio, ceu quam *Hippocrates l. de Art. Sect. 4.* suo jam tem-



pore valdè commendârit, tanquam sanatu facilem, ex qua etiam præter syncopem, quæ ex dolore propter incisionem tendinum & membranarum communiter excitatur, nihil sit timendum. Illud quoque ex prædicto *Paræo* l. II. c. 18. de amputationis loco adhuc notandum venit, quod non semper secundum indicationum regulas id saltem è medio tollendum, quod est p. n. sed præter hoc, respiciendum maximè quoque esse ad reliquæ partis, tum commoditatem, tum ornatum, e. g. Si *Sphacelus* pedem occupaverit, ad maleolos usque, si tibiâ ad quinque digitos contra genu amputationem esse instituendam, quo reliquo crure commodius & minori cum molestia sic uti poterit æger: i. e. crure ligneo incedere: Aliàs enim inquit, si minimum supra malum ex artis communibus regulis amputaveris, æger tribus se sustentare cruribus pro duobus majore tædio cogetur. Secus autem se rem habere cum manu existimat, ubi minimum sanæ partis abscindere jubet. Verùm priusquam abhinc discedamus, parumper quoque dispiciendum erit de eo, quod ex *Paræo* *Hildanus* annotat; anne scil. eo nomine, quod aliquis adhuc in parte sensus, vel levior aliquis motus observetur superstes, differendam esse amputationem jure quis existimare posset? Nos cum prænominatis *Auctoribus* negativam tuemur, quia in allegato exemplo sæpè moventur obsessæ *Gangrena* partes, non motu integri musculi, sed capitis tantum ejusdem utpotè *Gangrena* nondum infecti, quod dum se ex omnibus suis viribus movet, unâ continuum sibi tendinem & caudam etiam si mortuam jactat & in motum agit: Cunctari ergò in talibus malum esse, inquit *Paræus*. Et juxta *Hildanum*, prudens Chirurgus propter hunc motum non differt amputationem. Idem *Paræus* eleganter etiam declarat, quid te isto sensu doloris, quem nonnunquam ægrotantes Chirurgi persuadere volunt, sit judicandum: Duas nimirum hujus phænomeni profert causas, unam, phantasie de antegresso jam dolore errorem, alteram, operationum instituendarum apprehensionem. Præcedentis enim doloris tantam apud ægros esse efficaciam, ut non solum ante detruncationem membri, quantumvis jam planè emortui omnique sensu destituti, verùm etiam multos menses imò annos post factam operationem, ingentes quandoque pati dolores sibi imaginentur. Quod ipsum in magnam etiam rapuit admirationem, *Dn. Paræum*, quando l. c. c. 17. ait, *Mira profectò res est & planè prodigiosa, quæque vix fidem habitura sit, nisi apud eos qui oculis intuiti sunt & auribus hauserunt, multos post amputationem menses, conqueri ægros sibi adhuc crus amputatum dolere.*



XLIII. Nunquam verò sine præcedanea præparatione operationi se subjiciat æger, sed probè purgatum atque confortantibus munitum adferat corpus, necessum est. Cæterum Chirurgus omnia instrumenta ad operationem necessaria, habeat in promptu, decente ordine collocata, ne unum alteri ipso in actu, quo tempore ut plurimum maximè festinari solet, sit impedimento, atque sic fiat, quod Chirurgo cuidam apud *Doëringium*, accidisse legimus, referente *Hildano*. Ex præcipuis autem sunt, Culter falcatus major, & minores alii variæ formæ, Serra, de qua *Hildanus* & cum eo alii monent, diligentiores Chirurgum duabus semper instructum esse debere, ne si una per infortunium dissiliret, operationis negotium cum pessimo ægri damno interromperetur. Prætereà, Forcipes quoque scopo huic adaptatæ, Cauteria ignita variæ itidem figuræ, Fasciæ oxycrato imbutæ, Vesicæ bubulæ, Stuppa cannabina albumine ovi intincta, externaque stypticorum ex classe parata remedia alia, e. g. pulv. ex sangu. dracon. bol. armen. terr. sigill. pil. leporin. combust. calcanth. gyps. & similibus confecti, sint ad manus, ut & defensiva, quæ sæpius reiteranda. Collocato tandem ut decet ægro, amputandum membrum vinculis prius firmandum, ne in operatione vacillet. Cutis deindè cum subjecta carne musculosa fortiter sursum versus partes sanas trahenda, vinculoque aliquantulum latiore arctè constringenda. Sunt qui partem emortuam ligatura quoque coarctent, inter quos est *Guido de Cauliac. tr. 6. doctr. 1. c. 8.* ita ut spatium intermedio sectio postmodum instituatur. Prioris ligaturæ triplicem cum *Paræo* observamus usum. *Primò* enim, sursum sic abducti cum cute musculi, firmiter continentur, qui mox opere peracto deorsum iterum devoluti, abscissorum ossium extrema opperiunt, ita ut his post inductam cicatricem pulvilli & fomenti loco esse queant. *Secundò*, sanguinis fluxus hoc modò magis impeditur, præclusis & compressis vasorum ostiis. *Tertiò*, ligatura hæc parti stuporem inducit. Posterioris verò vinculi usum esse putat *Hildanus*, quod hoc modo dum præcavetur hæmorrhagia, qua adstantes cum ægro nonnunquam terrentur, Chirurgus calumniandi occasionem declinet.

XLIV. Ligata hunc ad modum parte, incidenda statim caro, non corrupta sed sana, quemadmodum jam supra dictum, ad periostrium usque, quod ab osse studiosè & celerrimè semovendum, ut & membranaceum istud ligamentum quod inter duo ossa tum pedis tum brachii occurrit; quod si negligatur, maxima inferentur ægro tormenta, quod



acuminatis sic ferræ dentibus, partes illæ variis dilacerentur modis. Denique os ipsum, & si duo, ambo simul maxima qua poterit fieri tam agilitate quam dexteritate refecanda. Post hæc, omnium *Primò* sanguinis profluvium est supprimendum, quod fit instrumento, quod Rostrum corvinum vocant, quo nimirum vasa protrahuntur, protrahæta ligantur, quibus ligatis, superius vinculum iterum removetur. Displicet tamen hic vasa ligandi modus *Hildano*, præsertim in delicatulis & extenuatis, in quibus non sine vitæ periculo administrari posse ait. Loco ergò hujus pro sistendo sanguine, vasa cauterio orbitali inurenda esse præcipit. Imò quo magis officiosè uno actu plura præstemus, instrumentum à Chirurgis quibusdam excogitatum, quod ipse cauterium Cultellare vocat, cujusque usum mirificè extollit, commendat; quo scilicet ignito dum partem incidimus omnia simul corrugantur vasa. Verùm tantum abest ut modum hunc *Hildani*, calculo comprobemus nostro, ut potius eundem quam maxime detestemur: non tantum ob eas quas *Peccettius* ex *Cornel. Celso*, *Hippocrat. & Galen.* profert rationes, sed & ob multas alias hic tamen loci silentio potius prætereundas. Nec propterea *Paræo* etiam assentimur, quando adustionem vasorum cauteriis actualibus tanquam summum facinus & Medendi Methodum crudelitatis crimine obstitam rejiciendam esse jubet. Nimirum, si dicendum quod res est, ambo errare videntur, unus in defectu, alter in excessu: Regiæ proindè insistendum viæ, scilicet nec igni, nec ligaturis, nec remediis aliis adstringentibus interdicendum esse, sed omnia suo tempore & loco commodè in usum trahi posse nostra stat sententia, quam auctoritate *Vigierij l. 1. c. 12.* confirmamus. In cauterii actualis applicatione studiosè observandum est, ne medulla ossium vim ignis experiatur, hoc enim modo cum ossibus facilè noxam pati posset: Tandem ergò ceu jam dictum, à vinculis pars liberanda, quo cutis cum mole carnea iterum abduci queat, quo factò stuppa cannabina cum pulvere ex stypticis & album. ovor. confect. imponenda, post vesica bubula oxycrato intincta vulnere obducatur, fasciisve una cum membro ipso obvolvatur. Defensivis quoque ante & post, parti sanæ prospiciendum est. Sunt etiam, qui peracta amputatione cutis futuram suadent, inter quos est *Paræus*, qui modum hunc prolixius docet. Arbitramur tamen argumenta quæ *Hildanus* in contrarium profert satis habere virium, quæ consilii hujus periculum cuilibet declarare queant. Sed justo latius nostra jam est progressa *Gangrana*, & omni opinione cele-



rius majus jam sibi ascivit spatium, canamus ergò receptui, ne unà cum A. L. Benevolentia, auro pretiosioris Temporis quoque patiamur jacturam:

*Interim sit Laus Honor & Gloria DEO TER  
OPTIMO MAXIMO pro Sua huc usq; Divi-  
nitùs concessa Benedictione. Faveat Is porrò piis  
nostris Conatibus, ut omnes tandem cedant in  
Divini Sui Nominis Gloriam & Pro-  
ximi nostri Salutem.*



## COROLLARIA.

### I.

In amputatione crurum Sphacelato-  
rum narcotica exhibere, si non  
noxium erit, saltem non multum  
conferet.

### II.

Ulcus quod cariem ossis comitem ha-  
bet nunquam perfectè sanabitur,  
nisi



nisi osse prius in integrum resti-  
tuto.

III.

A Tumoris alicujus duritie ad mate-  
riei in eodem contentæ qualita-  
tem instituta argumentatio, quan-  
doque fallit.

IV.

Frustraneum videtur esse Chirurgo-  
rum quorundam consilium, quan-  
do pro evacuando crassiore san-  
guine majorem plagam infligunt  
venæ, minorem vero quando ipsis  
animus est emittere sanguinem  
subtiliorem.

V. Ut



V.

Utut multis non absonum videatur  
assertum illud, quando Recentio-  
rum quidam volunt, Pus nihil esse  
aliud quam Chylum corruptum  
seu acidiolem, arbitramur tamen  
multa proflare argumenta, quæ si  
non prorsus impossibilem maximè  
tamen dubiam reddere debeant  
hanc sententiam.

\* thes. 5. pag. 4. lin. 26. post hæc verb. quod res est, lege, nec hæc  
omnem absolvit paginam;

